

四庫全書

集部

欽定四庫全書

東憲集卷十二

宋 張擴 撰

制七

左中大夫參知政事王次翁曾祖昇贈太保制
勅朕親仁善隣成孝治之大行慶施惠均海宇之歡贊
子籌畫之良繫爾股肱之助推本重祖申錫愍章具官
故曾祖某學通古今名重齊魯東觀寓直蔚有文名列
郡分符居多政績迨爾聞孫之顯允由餘澤之鍾用增

貴於幽扃俾峻陞於宮保靈其未泯尚克歆承

曾祖母劉氏贈福國夫人制

勅布漏泉之澤覃及萬方推顯親之仁上休三世眷予
近弼式舉彞章具官故曾祖母某氏孝順慈祥均於九
族惠和雍肅儀於高門富貴不在其身公卿實啟於後
秉我機政繫爾聞孫用申錫於湛恩俾易封於大國營
魂如在茂渥其承

祖寂贈少傅制

勅孝通於神允格非常之慶人本乎祖宜推欲報之私
眷予同心之良申頒錫類之祉具官故祖某志誠無已
行已甚恭得一同之地以長民未究所蘊種百年之德
而貽後宜大其門由春坊調護之聯陞九棘高華之位
營魂如在茂渥其承

祖母趙氏贈成國夫人制

勅本固者未必茂源深者流必長惟時輔臣實執國政
屬有邦富善人之賚宜私庭申王母之封具官故祖母

某氏有德有容惟勤惟儉來嬪君子萃忠孝於一門流
慶後人綿光華於奕世爰因沛澤載舉徽章肇開列國
之封益厚重泉之寵尚其精爽亦克欽承

父禔贈少師制

勅達人生於明德之後允推積善之休忠臣出於孝子
之門宜厚顯親之報具官父某懷材不試抱節無渝真
魯國園冠之儒深春秋繁露之學雖不求於聞達宜有
輝於方來峻陞孤棘之崇以貴幽窀之寂君恩湛渥潛

德其光

故母張氏贈茂國夫人制

勅陟屺興無窮之慕母道主慈揚名加所恃之親子貴
則顯具官故母某氏仁而厚下禮以齊家組紉不廢於
婦功盟饋動循於壺則積善既有餘慶流波宜及後人
用開有國之封益侈小君之號魂其未泯尚克歆承

故妻趙氏贈安康郡夫人制

勅曠蕩之澤均被四方兼存歿以䟽恩極哀榮而從厚

眷予近弼宜迨室家具官故妻某氏法度自循少有賢
行嬪于令族咸推姻睦之仁善相其夫致位疑丞之列
德則甚厚命乃不融雖垂偕老之榮宜厚無窮之寵尚
幾精爽不顯其承

左中大夫參知政事万俟卨曾祖琰贈太子太
保制

勅朕講信修睦以厚隣盟事親寧神以隆孝治爰敷德
澤均惠多方贊予政機賴我良弼宜舉令典式光曾門

具官曾祖某行高鄉評躬載令德懷孚尹旁達之信卻
形光外鎮之浮宜爾聞孫為時碩輔屬湛恩之誕布正
宮保以加崇尚幾營魂亦克歆享

曾祖母楊氏贈蘄春郡夫人制

勅上穹垂祐既推從欲之仁萬方均休爰舉顯親之典
矧予近弼可後愍章具官故曾祖母某氏夙以令儀來
嬪華族休有賢德慶鍾後人宜爾曾孫參予機密式因
盛禮申錫湛恩易湯邑於蘄春厚幽局之光寵

祖敏贈少傅制

勅配天其澤式恢至治之休自仁率親莫嚴尊祖之義
繫子碩輔宜舉徽章具官故祖某忠孝起家詩書貽訓
世仰義方之教有子則賢神扶積善之休至孫而貴故
茲贈祿之典益彰名數之榮位列三孤式光幽壤

祖母趙氏贈榮國夫人制

勅天生傑才克正弼臣之位國有大賚宜增王母之封
具官故祖母某氏植德溫恭律身勤儉禮謹四時之祀

仁均九族之和澤追聞孫位於二府屬茲沛渥申舉密
章開國以封式光泉戶

父湜贈太子太師制

勅德厚者報必豐位隆者禮亦異有賢嗣既陪於帷幄
豈恩休可後於彛章具官故父某學通大方政稱循吏
名實相副世共推其老成年德俱高晚乃位於通顯宜
爾教忠之訓為予同德之良用頒祿典之華寵以宮師
之峻九原冥漠尚幾歆承

前母李氏贈平原郡夫人制

勅國舉大典式昭漏泉之恩家有嚴君宜隆報本之禮
矧於近輔可後愍章具官故前母某氏恭順而慈于家
有則不廢箴圖之戒尤嚴蘋藻之羞德厚流光慶鍾賢
嗣肆追崇於異數茲易郡於平原尚幾營魂歆此休渥
故母侯氏贈通義郡夫人制

勅

上詞同

具官故母某氏婦則令柔閨風淑慎藹休名以

配君子躬懿行以宜家入德厚流光慶鍾賢嗣爰舉追

榮之典益新湯沐之封尚幾營魂歆此休渥

妻侯氏封同安郡夫人制

勅事君以忠必賴股肱之力勉夫以正本其閨門之賢
爰因沛澤之施用舉徽章之渥具官妻某氏言容兼備
禮法交修職中饋之勤不忘婦順積內助之德宜致身
榮易封同安用綏爾祉

檢校少師鎮西軍節度使充侍衛親軍步軍都
虞候行營右護軍都統制階成岷鳳州經畧使

吳璘曾祖謙贈少保制

勅朕惟皇天垂休羣工協力誠孝所格率土蒙恩瞻時
大將之良俾厚曾門之報具官故曾祖某躬載令德行
高鄉評是生聞孫為時名帥屬茲大賚之慶宜增上世
之榮亞保秩崇永光泉壤

曾祖母李氏贈溫國夫人制

勅上詞同具官故曾祖母某氏閨風淑慎婦德令柔善積

厥躬慶延其後維時名帥繫爾間孫屬茲大賚之行宜

增上世之寵易封列國式示湛恩

祖遂贈少傅制

勅國有大賚澤覃四方眷予在服之臣咸勵顯親之念
申舉祔典增賁重泉具官故祖某勵志無渝懷材不試
行既孚於故里慶遂溢於後人有孫方貴而擁旄追贈
宜申於刻蜜促登亞傅光賁幽冥

祖母齊氏贈潤國夫人制

勅上詞同

具官故祖母某氏淑慎飭躬慈祥睦族早有功

於內助遂貽慶於方來有孫方貴而擁旄追贈宜申於
刻密易封列國式示湛恩

父展贈太保制

勅國舉大典式昭漏泉之恩家有嚴君敢忘報本之禮
不間存歿用極哀榮具官故父某節義起家嚴明蓋衆
令譽藹聞於關陝有子並建於節旄方茲慶賚之行宜
厚追榮之渥峻陞宮保增賁幽寔

母劉氏贈慶國夫人制

勅

上詞同

具官故母某氏德範靜專禮容淑慎夙茂家人

之譽挺生男子之祥方茲慶賚之行宜厚追榮之渥易

封大國用賁幽宅

資政殿學士左朝奉大夫知紹興軍府事充兩

浙東路安撫使樓炤曾祖闕贈太子太保制

勅朕肇禋重屋既興九廟之思均隆羣功爰及三世之

遠具官故曾祖某素行表於鄉里雅志樂於邱園流慶

聞孫為時近弼屬告成於熙事用追賁於曾門其陞宮

保之聯以厚泉扃之寵魂其未泯用克歆承

曾祖母吳氏贈琅琊郡夫人制

勅朕受釐上帝均福寰區維時樞輔之賢宜厚曾門之寵具官故曾祖母某氏溫恭稟質勤儉宜家早以令儀來嬪隱德肇禋既事方䟽大賚之恩愍典增榮用渙小君之渥易封大郡式慰營魂

祖定國贈少保制

勅祀事甚大幽以格祖考神祇之歡祭澤不遺下猶及

輝炮翟閣之賤睠乃機庭之貴宜增上世之榮具官故
祖某潛德有聞抱材不試迹其流慶之遠嗣有聞孫之
賢位居弼臣恩及祖廟其峻陞於亞保用增貴於幽宅

祖母郭氏贈申國夫人制

勅朕歲事合宮均釐在列既渙祖廟之寵必申王母之
恩具官故祖母某氏淑慎為儀柔恭作則系出令族來
嬪高門德推內助之賢慶襲聞孫之遠易封申國用渙
湛恩魂其有知尚克歆享

祖母葛氏贈萊國夫人制

勅上詞同

具官故祖母某氏禮以宜家仁而厚下盥饋勤
循於壺則組紃不廢於婦功德推內助之賢慶襲聞孫
之遠疏封列國用渙湛恩魂其有知式克歆享

父居明贈太子少師制

勅達人生明德之後允推積善之休忠臣出孝子之門
宜厚顯親之報爰因慶賚申錫愍章具官故父某純誠
內融景行外著易退而安其位雖終老於郎潛豐報則

責之天遂晚從於子貴秩高名顯生榮死哀用峻陟於
宮師以增光於泉戶魂其未泯尚克歆承

母范氏贈高平郡夫人制

勅朕躬三歲之祀而受福臣必餽君之餘序羣工之位
而䟽恩母應以子而貴具官故母某氏令儀著於閨闈
慈訓協於箴圖繇積善之彌深致流芳之不替眷我機
庭之舊宜推禰配之榮正位小君䟽封列郡時乃異數
增賁幽宅

母歐氏贈始興郡夫人制

勅

上詞同

具官故母某氏修身淑慎合族慈祥繇積善之
彌深致流芳於未艾眷我機庭之舊宜推禰配之榮正
位小君䟽封列郡時乃異數增賁幽窀

故妻林氏贈通郡夫人制

勅朕躬三歲之祀而受福臣必餽君之餘序羣工之位
而䟽恩妻應以夫而貴具官故妻某氏禮法持身靜專
稟質克配善士休有令名用正位於小君仍啟封於列

郡裘褐故在猶彰德耀隱居之風筭珎雖華終負山濤
布衣之約尚幾不昧歆此殊休

揚武翊運功臣太傅橫海武寧安化軍節度使
充醴泉觀使韓世忠曾祖則追封營國公制

勅朕親仁善鄰成孝治之大行慶施惠均海宇之歡睠
予舊弼之良宜厚一門之寵具官故曾祖某潛德弗耀
至行無疵譽藹一時之芳澤鍾三世之遠茲因沛渥申
錫愍章列國䟽封用光寔宥

曾祖母郝氏贈兗國夫人制

勅

上詞同

具官故曾祖母某氏禮容淑慎德範靜專善獨積於厥躬福遂綿於三世茲因霈澤申錫愍章載䟽東究之封益侈幽扃之渥

祖廣追封代國公制

勅漏泉之澤方覃及於羣工顯親之章式上休於王父具官故祖某行高鄉黨惠洽宗姻善既積而有餘名益彰而不朽施於孫子為時勲臣茲頒慶賚之恩用極追

榮之典易封代壤式賁重泉

祖母高氏贈雍國夫人制

勅漏泉之澤方覃及於羣臣顯親之章式上休於王母
具官故祖母某氏飭躬淑慎睦族慈祥早殫助內之勤
遂享方來之祉宜爾孫子為時勲臣茲因慶賚之行可
後追榮之渥易封大國增賁幽窀

父慶追封唐國公制

勅配天其澤式恢至治之休自仁率親莫重嚴君之報

具官故父某誠明遇物節義起家宜大門閭驗于公之
陰德有光祭祀彰狐突之教忠屬茲慶賚之行宜渙追
榮之寵易封唐國增貴幽局

母賀氏贈揚國夫人制

勅曠蕩之澤式昭漏泉之恩鞠養之慈宜隆報本之禮
具官故母某氏早由令族來嬪高門是鍾男子之祥實
我籌帷之舊爰因大賚申錫愍章用更維揚之封以厚
幽宅之寵

故妻白氏贈譚國夫人制

勅朕荷天之休丕隆孝治爰敷厚澤以惠多方恩及閭
門之私禮無存歿之間具官故妻某氏溫恭稟質勤儉
宜家義雖重於齊眉壽卒垂於偕老屬茲大賚申錫慤
章易封長沙永賁幽壤

故妻梁氏贈邠國夫人制

勅

上詞同

具官故妻某氏柔嘉有則恭順而慈警戒雖篤

於相成富貴莫終於偕老屬茲大賚申錫慤章易封於

邠永作爾寵

妻茅氏封蘓國夫人制

勅夫婦有相成之道茲本人倫室家申燕喜之私莫踰
國寵具官妻某氏動容有禮箴誨是遵慈惠宜其家人
柔嘉克配君子屬茲大賚申錫徽章用䟽湯沐之封載
易姑蘓之壤是為異數毋怠欽承

侍衛親軍都虞候清遠將軍節度使御前統制
王德曾祖永贈太子少保制

勅朕外敦鄰盟內隆孝治爰敷惠澤誕播宏休惟時在
服之臣咸茂顯親之典具官故曾祖某抱材不試秉禮
自防行實懿於羣倫慶遂延於三世為時名將繫爾曾
孫屬茲大賚之頒宜錫愍章之渥秩以官保用光重泉
曾祖母郭氏贈高平郡夫人制

勅

上詞同

具官故曾祖母某氏齋莊秉質勤儉肥家常種

德於百年遂流光於三世為時名將繫爾曾孫茲屬大
賚之頒宜渙愍章之渥小君錫號幽壤增榮

祖忠立贈太子少傅制

勅

上詞同

具官故祖某素行表於鄉里雅志樂於邱園流慶聞孫為時節將屬茲大賚爰錫愍章其官官傳之榮以渙泉局之寵

祖母韓氏贈恩平郡夫人制

勅

上詞同

具官故祖母某氏修身淑慎合族慈祥善有餘於一身福遂昌於再世屬茲大賚宜舉愍章其錫號於小君用增光於幽壤

父達贈太子少師制

勅

上詞同

具官故父某秉心忠孝植德溫恭善積之慶有餘源深而流益遠有子甚偉為時而生屬茲大賚之頒

申錫愍章之渥宮師增秩泉戶用光

母李氏封信安郡夫人制

勅

上詞同

具官母某氏令儀著于閨闈慈訓協於家庭繇積善之彌深致流芳之不替遂從子貴休有恩封其正位於副笄益欽承於異數

妻尹氏封永嘉郡夫人制

勅朕丕隆孝治施澤臣工眷惟節鉞之英亦燕室家之
喜具官妻某氏芳猷茂著懿範夙成推內助室家之賢
嚴中饋率職之禮屬頒大賚用錫徽章其正位於小君
往欽承於明命

武當軍節度使充侍衛親軍步軍都虞候利州
路安撫使兼川陝宣撫使司都統制楊政曾祖
諒贈太子太保制

勅朕祇事重屋幽已格於羣神均釐周行遠猶及於三世具官故曾祖某躬載令德行高鄉評是生聞孫為時名將方擁節旄之貴宜增家廟之光官保之聯品秩惟峻魂其未泯尚克歆承

曾祖母任氏贈河陽郡夫人制

勅朕受釐上帝均福寰區維時節將之崇宜厚曾門之寵具官故曾祖母某氏閨風淑慎婦德令柔善積厥躬慶延其後肇禋既事方䟽大賚之恩增賁下泉用侈追

崇之典小君之號封爵惟崇魂其有知尚克歆享

祖崇贈太子太傅制

勅祀事甚大幽以格祖考神祇之歡祭澤不遺下猶及
煇胞翟闇之賤顧乃節旄之貴宜增上世之榮具官祖
某潛德有聞抱材不試迹其流澤之遠宜有嗣孫之賢
宮傳崇資名器所重式昭異寵以賁下泉

祖母雷氏贈武陵郡夫人制

勅朕藏事合宮均釐在列既渙祖廟之寵必申王母之

恩具官故祖母某氏節儉宜家柔嘉作則系出令族來
嬪高門德推內助之賢慶襲聞孫之遠小君之號封爵
惟崇魂其有知尚克歆享

父志贈太子太師制

勅五經於祭為重茲展事於合宮百行以孝為先必增
光於禰廟朕推祭澤賚及羣臣具官故父某種德惟深
懷材自晦雅尚丘園之志不圖軒冕之榮德厚流光慶
鍾賢嗣肆追崇於愍典用陞峻於宮師瞻彼幽局尚歆

吾寵

母程氏贈高密郡夫人制

勅臣餽君之餘既霑於祭澤母以子而貴宜厚於恩章
具官故母某氏蘊淑德以宜家人躬懿行以配君子慶
鍾賢嗣高大門閭既正位於小君仍易封於大郡哀榮
之至式賁泉扃

故妻侯氏贈通義郡夫人制

勅衛上以忠雖資將相之勇勉夫以正本其閨門之賢

爰因祭澤之頒用舉愍章之渥具官故妻某氏凝姿婉
孌克已儉勤族推其仁早篤宜家之慶天嗇厥壽莫諧
偕老之榮用錫命於小君仍䟽封於列郡魂其不昧尚
克歆承

妻南氏封同安郡夫人制

勅衛上以忠雖資將相之勇勉夫以正賴其閨門之賢
爰因祭澤之頒用舉褒章之渥具官妻某氏言容兼備
禮法交脩職中饋之勤不忘婦順積內助之正宜致身

榮用錫命於小君仍疏封於列郡祇我殊寵母怠欽承

安榮贈三官恩澤三資張世忠贈承信郎制

勅具官某等頃在川陝奮身兵間義重於生卒以戰隕
久而未錄朕豈汝忘庸增爾官並恤其後忠魂如在尚
克歆承

李丕循右從事郎制

勅具官某頃者盜發江東猖獗惟甚師旋奏凱爾預有
勞肆增厥官以為爾寵益思懋勉以稱所蒙

趙璜循右從事郎制

勅具官某間者慈寧回鑾中外均慶爾以使屬奉迎有勞其增厥官以為爾勸

李璘循右從事郎制

勅具官某朕仰惟慈寧回鑾中外稱慶奉迎官吏趨走在途肆疇其勞用增爾秩往思自懋以稱所蒙

霍輅循右從事郎制

勅具官某往歲淮西用武捷奏日聞雖一時汗馬之功

亦千里饋糧之助士得飽食爾預有勞其增厥官以示
激勸

王光賓循右從事郎制

勅比者梓宮言還中外興慕一時官屬迎護良勞爾在
選中合頒信賞進階三等用答爾勤

宋許循右從事郎制

勅具官某頃者邕管鳩工繕修城壁爾以健敏預有勞
能其增厥官以為趨事者之勸

黃鯉循右從事郎制

勅具官某朕哀矜庶獄嘗著定令以一歲禁囚瘐死之多寡為逐路理官之殿最爾膺此賞是謂能承吾欽卹之意

王輅成徐揚循左文林郎何幾先循右從事郎
制

勅具官某等車輅旂常之制所以昭等威也朕比詔有司講求其制煥然百度為之一新爾預有勞可無勸賞

其增爾秩往務欽承

陳志應循右從事郎制

勅具官某先王之時百工技藝咸欲精巧勒名考試以第殿最况戎器乎今歲終會課爾勞足錄其增爾秩以爲趨事者之勸

向子廣循右從事郎制

勅具官某間者戈船之役辦集如期爾預有勞宜加優賞進階一等往務欽承

王蕭循右從事郎制

勅具官某頃者敵人南牧犯我疆陲江陰之城實當控扼攻守之備爾預有勞其增厥官以示信賞祇承朕命往哉惟欽

楚州通判李處經降右宣義郎制

勅具官某國有賓客館御在途饗餼牲牢戒於菲薄爾攝承郡寄事得按行慢令弗虔豈知體國削官二等庸示薄懲

歐陽燾降左宣教郎劉璞降右宣義郎黃沆降

右地功郎制

勅具官某等人命至重折獄惟難君子於此必盡心焉則以求生也爾等聯職州郡漫不加省視三尺為具文幾誤論決褫官之罰是為輕典往務循省毋重悔尤

劉景真降右承事郎制

勅具官某嚴保任之法所以防姦偽也爾以名家揚歷舊矣乃失詳慎幾誤有司褫官之懲是為輕典往務循

省母重悔尤

李莘民降右通直郎制

勅具官某縣令近民之官以承流宣化為職爾催科亡
狀奉法不虔具案有司宜從薄責褫秩一等益務省循
程邁降左宣義郎郭元亨降右儒林郎制

勅具官某爾以筦庫之官奉法不恪削秩一等以為失
職者之戒尚務循省體我寬恩

沈柄降右儒林郎制

勅具官某出納之吝謂之有司爾為幕官不知守法侈用自肆背公徇私姑襦一階是為薄罰服我明訓益務省循

沈綰降右承議郎制

勅具官某爾倖偏州專察郵傳稽留之失罪在不虔其鑄一官以示薄責

楊傑降武翼郎制

勅具官某擁酤為州利源不可不謹也爾為監官慢令

弗虔黷襲敗惡陷失歲課其鑄一官以為隳職者之戒

徐嘉問降右朝請郎耿榛降右奉議郎制

勅具官某等爾等頃倖長沙實分郡政故縱貪暴國有常刑其褫一官尚思循省

賈俊降承節郎制

勅具官某爾服職戎行不畏三尺聚徒誦博規利自營姑褫一官是為輕典爾其內訟以蓋前愆

燕仰之降右宣義郎制

勅具官某三尺之設如權衡然少或過差要非平允爾
久居法寺專習刑書而輕重之間議罪失當褫官一等
庸示薄懲往其慎哉以稱朕意

孔立降忠訓郎制

勅具官某爾名隸軍籍擅去戎行姑褫一官是為輕典
益務循省毋重悔尤

修武郎閤門祗候權長陽知縣胡勉降一官趙
頴之降左文林郎制

勅具官某爾攝百里之寄不能布宣德意而乃違法徇私恬不知懼褫官一等庸示薄懲往其欽承益務循省

朱芾落敷文閣待制知徽州制

勅姦軌敗謀既申邦憲僉壬附會難追刑章具官某早預選掄屢更任使意其詳練俾參軍旅之謀庶無詭隨少副朝廷之委而乃阿諛希寵暗默保身闕然裨補之勞坐閱貫盈之惡滋長稂莠遂尋斧柯致物論之沸騰豈寵榮之冒據其罷西清之職仍還南國之符服我寬

恩無忘內訟

任叔向閣門看班祇候落看班字制

勅具官某上閣設屬所以佐其長肅班列端朝儀也朕嘗使爾試之矣夙夜在公允稱詳練俾正厥職毋怠欽承

武平知縣張安節降一官制

勅具官某頃者盜發閩中帥聞示朝廷恩信開其自新之路爾乃妄作幾致紛紜其褫一官以示薄罰服我明訓

益務省循

右承議郎徐夙等各降一官制

勅具官某朕比遣郎吏案行諸州察財用之盈虛稽有司之出納爾乃違法慢令縱吏為姦事狀甚明罰其可追姑從貶秩宜務省愆

太史局令吳師顏降一官制

勅具官某間者修奉祐陵事大體重凡百執事所宜盡心而爾以歷官乃敢滅裂其為弗恭甚矣貶秩尚為輕

典也

拱衛大夫解州防禦使馬欽於遙郡階官上各
降一官制

勅人臣在列庶耻所以律身王者御人刑罰所以懲惡
具官某擢居橫列久被厚恩涓塵之報未聞宜知止足
之戒丘壑之欲不滿尚肆貪饕之求戚實自貽法難汝
貸姑從鐫秩猶示寬科往務省循毋重尤悔

左奉議郎趙子溫左承議郎薛倬各降一官制

勅具官某等王者用刑莫先明慎爾等官於棘寺乃失
詳讞鑄秩一等庸示薄懲服我寬恩無忘循省

掌均都潔姜覺上官世端各降一官制

勅具官某等巡尉越境賊害良民朝廷付之有司所以
核實也而爾等身為郡吏徇私滅公枝蔓其詞不以情
報此而不懲何以示戒各鑄爾秩往務省循

知楚州武畧大夫傅延嗣降兩官制

勅具官某國有賓客館御在途饗餼牲牢戒於菲薄爾

身試郡寄職在將迎乃罔聞知豈謂體國其從貶秩之
罰以為慢令之懲

楊適特改右宣教郎制

勅具官某爾淵源之學實卒父業孝友之行有光鄉評
棲遲小官晚節彌厲召對便殿論議詳明更秩甚優往
圖報稱

宋蒼舒轉右宣教郎制

勅具官某往歲關陝用武捷奏日聞雖一時汗馬之功

亦千里饋糧之助以爾肅將使指風力敏彊軍無乏興
備著成效其頒增秩之寵以示勸賞之公服我恩榮毋
忘勉勵

陳賡改右宣教郎制

勅具官某朕比遣樞輔視師江淮爾從其行彊敏自力
宜頒更秩之寵以示賢勞之休服我優恩益思懋勉


勅令書成張浚回授計有常特轉右宣教郎制
勅具官某夫士大夫貤恩於其子孫蓋常制也弗以及

子孫而請遺舅氏則猶遺母也浚為朕股肱大臣出入
將相富且貴矣而母在焉是真能成爾之宅相者也比
因勅令書成法應進秩更以爾受賞爾其往祇成命使
為人子者入有以感其親則一官豈爾之榮母乃爾甥
之榮與

周莊仲轉左承議郎曹績轉左朝奉郎陳最轉
左宣教郎制

勅具官某等朕惟川陝重兵連屯捍邊甚勞閱歲寢久

比遣近臣往諭德意爾等咸以忠蓋實佐其役萬里言
還亦良苦矣詩云有功而見知則說肆增爾秩尚往欽
哉



欽定四庫全書

集部

東憲集卷十三

詳校官庶吉士臣翁樹培

侍讀臣孫球覆勘

謄錄監生臣范重榮

欽定四庫全書

東窓集卷十三

宋 張擴 撰

制八

孟忠厚知建康府制

勅建業名城負山川形勢之勝江東會府據舟車往來
之衝今為陪都尤慎居守孰膺師帥之託必藉股肱之
良具官某識照幾微學窮今古君子之行正衆高一時
肺腑之英賢牧之政近民餘兩郡棠陰之愛頃疇德望

入長樞庭侍帷幄之邃嚴資謀猷之佐助屬上請閒之
惻用推均逸之恩肆頒贊書俾重制閫初分長樂之寄
既壯其行載更金陵之符庶幾未遠尚煩卧治其體眷
懷

鮑琚除直敷文閣知鎮江府制

勅具官某丹陽為城實控吳會北固設險下臨長江肆
求共理之良以任于藩之寄以爾學通世務知適事幾
入聯宰士之華高彌綸於省闈出總兵儲之要裕財賦

於上流有嘉將命之勤宜被陟明之寵寓內閣之直分
輔藩之符時乃異恩往圖報効

張宗元知靜江府制

勅承流宣化責莫重於守臣御衆牧民任尤嚴於帥閫
矧桂林之會府作巨屏於南方是資邇聯申錫休命具
官某議論深有本末風力屢更劇繁入貳夏官練達五
兵之要出分符竹均施千里之仁屢閱歲陰有嘉治最
其輟姑蘇之政往綏嶺嶠之氓益懋事功式寬憂顧

何懋知潼川府制

勅侍從之臣朕所倚信分符遠服允資共理之良移節
巨藩用圖詳試之効具官某器識宏遠學問深醇入與
論思罄忠嘉而告后出膺牧養務平易以近民有嘉治
最之優申錫恩章之渥朕惟西蜀大者幾州爾以七年
遂更三鎮比隣父母之國習知風俗之宜名實已孚士
吏自服奚俟朕再三之訓往循汝清靜之規

王暉除敷文閣待制知臨安府制

勅西清高華次對為侍臣之列天府浩穰尹正居諸夏
之先眷茲委任之難必求名實之副我有髦士用頒明
綸具官某早以能名屢更器使緣吏事以儒雅何施不
宜溢政聲於嚴明所至稱治望雅高於郎省節屢易於
外臺徧儀論譔之華深見典刑之舊其輟甘泉之從以
增帥閫之權夫道德之威成安彊朕方極四方之選而
輦轂之下先彈壓爾其試三輔之能治最上閭暮月可待

張奉顏換給武略郎制

勅具官某爾頃在川陝立功累勞或需覃需遷補五官
率用帥閫便宜蓋從權也今列上有司請易以真夫王
言作命誠有不可已者

張奉顏換給武略郎制

勅具官某頃在漢中累勞應賞率用帥閫便宜增秩今
列於有司請易真命申錫贊書尚往欽哉

龍神衛四廂都指揮使寧州觀察使王權父克
常贈武經郎制

勅朕外敦隣盟內隆孝治誕敷惠澤以綏四方惟時在
服之臣咸舉顯親之典具官故父某抱才不試履行有
間積善既深有子而顯屬茲大賚宜厚愍章增秩之榮
式光幽壤

吳益轉右武郎制

勅具官某禮隆宮掖澤被私門同氣之親宜膺異寵陞
副橫列庸侈國恩

環衛宗室士志換武節郎制

勅具官某朕惟環衛宗子入則奉朝請退而無私交蓋親之也或請試吏以術業自見則夷考其素而命之亦不汝違以爾修潔矜慎操行有聞俾歸銓曹易階而仕蒞官行法自此始矣可不勉哉

魏堯臣特補右廸功郎制

勅具官某朕通問軍前臨遣敵使爾以幹略實從其行肆命以官以為爾寵仕自茲始圖報惟忠

陳靖上書特補右廸功郎制

勅朕廣取人之門務求其實勤乙夜之覽時拔其尤爾
來自遠方奏篇甚富有用之學豈驚空言論事之餘文
采自見縻爾以爵朕將有所試焉

孔履常上書中書後省名詔特補右迪功郎制
勅某人朕數路取人猶懼失士間閱囊奏有味其言則
爵以縻之所以示勸也爾以書生言達予聽試諸有司
詞彩粲然命爾以官往圖報効

鍾離松轉右承事郎制

勅具官某朕間遣輔臣遠修鄰好爾以幹敏常從其行
見謂賢勞宜頒信賞增秩二等其務欽承

普康郡主潘氏夫鄭珙轉右承事郎制

勅具官某爾以才華聯姻肺腑叅稽舊典用渙湛恩其
增一官勿忘欽慎

朱秉文循右承直郎制

勅具官某川陝市馬入充廐牧所遇州縣調度尤艱爾
令竹山臨事不苟驛舍芻秣檢校惟時使者以間不可

無賞增秩一等用勸其餘

李若川玉輅成循右承直郎制

勅具官某朕惟車輅旂常之制所以昭等威也艱難以
來禮文殘闕比詔有司修舉舊儀爾預有勞其可無賞
肆增厥秩往務欽承

尹機循右從事郎制

勅具官某朕內嚴武備戎器是資歲案度程計功行賞
爾以幹敏嘗預有勞其增一階以為爾寵

張良臣循右從政郎制

勅具官某間者陳兵淮壩饋餉為急爾謹出納見謂賢
勞其陞一階以示勸賞

馬仲謙循右從政郎制

勅具官某朕惟州縣租賦按籍而知艱難以來寢失其
實因陋就簡弊固多矣爾承都昌究心民事逃田隱戶
檢校無遺有補公家人不告病其陞一階以為作者之
勸

張峇循右修職郎制

勅具官某頃者關陝用兵膚公屢奏爾於行陣擒獲有勞其陞一階以昭信賞

丁騏循右修職郎制

勅具官某往時軍興財用是急都督府下鬻爵之令豈獲已哉然而勸誘有方便一時豪右至於樂輸亦由州縣之官得人也其增一官以為爾寵

應常循右修職郎制

勅具官某爾頃以鄉豪募衆捍賊嘗傾家貲忠義足錄
閱時雖久朕豈汝忘哉其增一階以示勸賞

宗室趙公渙登科循左修職郎制

勅具官某朕博叙宗族非專以恩彊於為善則必有賞
以爾天資開敏好學而文羣試有司適中程度肆增爾
秩用勸其餘

宗室趙公晰登科循左修職郎制

勅具官某等周之宗盟異姓為後朕倣古之制博叙族

屬其來尚矣矧能射策決科藝業自見乎宜增爾官以
示一時之勸

詹如松循左修職郎制

勅具官某爾為尉百里蒞職甚勤教閱弓兵挽彊應格
增秩示賞用勸其餘

張軒陳汝舟竝循右修職郎制

勅具官某等權酤之利實佐國用爾能其官馴致增美
陞秩示賞式勸其餘

富之彥循右文林郎制

勅具官某間者戈船之功責在近郡爾以掾屬監護有勞宜增厥官以為爾寵

魏彥扑降右文林郎制

勅具官某朕宿兵上流衣欲時給爾乃慢令縱其滯留挾纊之溫何賴焉其褫一官以示薄罰服我明訓益務省循

王杞循右文林郎制

勅具官某間者戈船之後不擾而辦爾以幹敏嘗預有勞其陞一階以為爾寵

蘇括循右文林郎制

勅具官某間者王師在途糗糧不乏爾典出納備著勤勞增秩之恩庸示勸獎益思懋勉以稱所蒙

俞名虎張濶趙沂竝循右承直郎傅佺循左儒林郎張大猷俞倓並循右文林郎制

勅具官某等朕比遣樞輔視師江淮爾從其行幹敏有

譽宜進厥秩以旌爾勞往務欽承毋忘報稱

張允修右文林郎制

勅具官某比者戰艦庀工如期而集爾以承屬協濟惟勤用頒渙恩以為趨事者之勸

丁驤循右文林郎制

勅具官某間者留都營繕百堵皆作爾以縣佐董役良勤陞秩示恩毋忘懋勉

張允蹈循左儒林郎制

勅具官某江西羣醜嘯聚偏師剪滅軍無乏事爾與有勞肆頒渙恩以昭信賞

高譽循右儒林郎制

勅具官某比者戰艦庀工如期而集爾以州掾協濟惟勤用頒渙恩以為趨事者之勸

周淵循右儒林郎制

勅具官某權鹽之利國計是資推行有方允賴能吏爾善於其職以增羨間俾進一官庸示信賞

任大方循左儒林郎制

勅具官某間者西師野次饋餉惟艱軍無乏興爾亦協力進階二等用疇其勞

趙彥換給左儒林郎制

勅具官某間者宿師閭中繕治營壘爾以縣令預有勞能賞典之頒尚稽真授申錫書贊其務欽承

米友仁轉右朝請郎制

勅具官某權鹽之法具有成規惟推行之得人則阜通而

無雍以爾風力彊濟智慮疏明將命浙西率屬無怠歲終會課以增羨聞何靳一官庸示勸賞

湯孫將降左朝請郎制

勅具官某頃者閩部劇賊納款自新招懷之初事屬帥閭爾輒生事幾致紛紜其褫一官以示薄責服我明訓念咎無忘

仇愈復左朝請郎制

勅具官某早膺推擇服在近班濟劇撥繁有魚人之譽

牧民御衆有分閭之才頃貽吏議之譏亦既歲時之久屬施寬大之澤宜從牽叙之科朕命匪私爾其自勵

左朝散大夫充顯謨閣待制提舉江州太平觀
張致遠父默贈右朝請郎制

勅具官故父某秉德忠恕宅心謙虛善積於身而不遺慶延於後而有衍宜爾令子為時名臣屬頒大賚之恩載厚追榮之寵肆增顯秩式慰營魂

鄭德年永祐陵殯宮復按使轉左朝請郎制

勅朕愴念梓宮之言歸獲備送終之禮乃眷越岡之在
望爰興卜宅之工抨圖雖屬於有司復按必資於邇列
逮茲第賞可後數功具官某識照幾先智周物表探聖
哲書言之奧洞見是非考國家制度之詳灼知本末頃
以經術入侍講帷每殫告后之猷尤見欽王之義

王道轉右朝奉郎張存誠轉右朝請郎制

勅具官某等川陝市馬入充廐牧道途阻修尤艱調護
驛舍其最急者也爾等臨事不苟檢校惟時使者以聞

不可無賞用增爾秩式慰賢勞

黃仁榮轉右承議郎制

勅具官某朕惟梓宮北歸中外悲慕言念入疆之始實
資應辦之勞幹敏得人事無不濟肆增厥秩用旌爾勤
李流轉右朝散郎李元善轉右承議郎制

勅具官某等權茶之券便於阜通偽文亂真實蠹良法
爾參驗精密灼見其姦何靳一官以勸來者

王懷轉右朝請郎葛宗顏轉右承議郎制

勅具官某等間者修奉祐陵實國大事鳩工庀役必欲及時爾等咸以郡僚究心夙夜其增厥秩用旌爾勞

衛閔轉左承議郎制

勅具官某擢茶有券以便阜通贗文亂真實害成法汝能獲濟備見究心其增一官以昭信賞

周聿復右承議郎制

勅朕孝通神明既舉非常之典澤覃中外用蠲一切之辜凡服官聯悉從牽叙具官某早膺器使嘗列從班省

寺踐勞休有譽處頃貽史議寢閱歲時屬誕布於湛恩
其漸還於故秩往祇朕命自勵毋忘

周公彥御史臺檢法官制

勅具官某御史府紀綱之地一時僚屬必用正人以爾
學問淹該操守剛特鉤檢簿領既高詳練之稱明習憲
章更試持平之効往祇朕命毋怠欽承

汪勃御史臺檢法官制

勅具官某三尺之令猶權衡然百官有司相與承奉以

立政事者也惟御史府得其平則天下平矣居是職者可非其人歟以爾學古自信秉彛有常内存忠厚之誠外立靖共之操宜膺擢擇游被褒陞其列柏臺之聯往按惠文之律必欽乃職惟爾之休

詹大方御史臺檢法官制

勅具官某御史府紀綱之地擇屬惟賢雖按惠文亦以才舉以爾天資樸茂學術深醇仕路淹回操守彌勵其以儒雅往善刑名庶幾仁人之言或為風憲之助

張澄戶部尚書落權字制

勅政在足食嘗聞夫子之言義先理財幾半周公之典
惟民部實任是責非英髦孰長厥官詳觀已試之能申
錫為真之命具官某蘊利物之策負魚人之才遇事必
為曾錯節盤根之避成效甚速由提綱振領之知擢在
近班久資心計屬邊障尚多於兵戍而國家申講於禮
文調度既繁幹旋是賴宜陞峻常伯之位以超冠從臣
之聯蓋念仁賢弗信則空虛為憂制度不節則傷害或

至雖人君與足於百姓豈務多藏然有司謹蓄於九年
蓋圖善後往祇朕訓毋怠汝為

鄭億年除提舉醴泉觀魚侍讀制

勅朕萬機之暇間御邇英旁招鴻博之儒以輔緝熙之
學維時俊乂式副詳延具官某早登巍科稱重多士元
成經旨獨承迺父之淵源崔琳家聲深識本朝之典故
屢膺推擇寢歷清華進長書林曾冠英游之列聯華禁
路莫高秘殿之班嘉乃踐揚彌休譽處朕方留神載籍

羣萃者英樂間祖宗垂裕之言如陳堯舜可行之道是用逸之珍館俾侍前旒庶幾從容少資啟沃爾其務展底蘊益尊所聞時於勸讀之餘不廢告猷之益

段拂除禮部郎官魚玉牒所檢討官制

勅具官某郎官上應列宿以待才能儀曹號稱舍人魚取文采孰膺是選每難其人以爾學富見聞辭尚體要久寓冰廳之直游揚省戶之休茲用所長豈云次補往究禮文之殘闕仍魚帝系之編摩益殫乃心式對休命

張崇起復右武大夫康州團練使遊奕軍統領
胡清起復翊衛大夫貴州防禦使御前前軍副

統領制

勅干戈衛社忠臣何以家為衰經臨戎禮制或由義起
具官某早稱果毅列於偏裨折馘執俘屢效摧鋒之勇
寢苦枕塊俄纏陟岵之悲胡清云陟岵其務合於權宜以往
祇於舊服立身無愧則孝之終

李通起復中衛大夫忠州團練使鄜延路兵馬

鈐轄御前統領制

勅于戈衛社忠臣何以家為哀經從戎禮制或由義起
眷時臬將申錫贊書具官某早有威名聞於關陝克厲
訓齊之律屢收斬獲之勲比罹家艱服在哀疚其起臨
於金革用深合於權宜移孝為忠益思自奮

賈思誠除都大主管川陝茶馬制

勅具官某朕惟川陝互市之法實祖宗之宏規外通有
無內蕃牧圉往將使指必務得人以爾心術疏明吏能

疆濟持節於外治最有聞必能為朕講貫利源輯和種
落博收駟駿以助吾富國強兵之術祇服朕訓益盡心
焉

王傳除提舉淮南東路茶鹽制

勅具官某朕惟茶鹽之利國計所資異時兩淮實甲諸
路兵火之後歲入雖未能盡復然按治得人奉行有方
亦何難焉爾性資疏通風力疆濟雅喜足國裕民之策
見於摘山煮海之饒江左代還有嘉詳練淮壩易節申

錫贊書朕方圖因任之能汝其推已試之効

王綰除湖南路提點刑獄賈思誠夔州路轉運
判官施舜顯江西提舉茶鹽制

勅具官某等朕分道而擇能臣臨軒而授使者朝廷德
意欲速於下究民間疾苦忌壅於上聞苟非其人孰任
此寄以爾綰儒學決事見於屢試以爾思誠以爾舜顯
才術蓋衆沛然有餘其分節於遠方益盡心於乃職夫
刑平則獄市弗擾財裕則民力自寬三尺具存奚俟多

訓

張闡范雎並除秘書郎內張闡魚史院檢討官

趙衛錢周材並除著作佐郎制

勅具官某等朕廣儲英髦實待器使石渠東觀咸以次
陞譬猶合抱之材長養成就豈一日之績哉以爾闡爾
雎問學之審詞藝之工朕故使之典四庫之書以資其
博以爾衛爾周材器識之遠行實之孚朕故使秉太史
之筆以信其公雖尚周旋三館之游然亦曲盡一時之

選乃若編摩之助教導之勤各因爾能尚賴餘力

孫近落資政殿學士依舊宮觀制

勅進參機政既彰誤國之謀退處私庭猶冒通班之寵
以大臣而廢法豈明主之用心其議薄懲少申公論具
官某早被簡拔寢更險夷遂由清切之班入預弼諧之
列不務竭忠而圖報徒知利己以自營忌刻本於天資
乖疎何但晚謬關通近屬欲借譽於齒牙之餘串昵佞
人頗締交於膠漆之固昨下詔收權綱之始以元勳居

廊廟之嚴爾侍宸旒曾陪國論乃退有三三之說冀陰
為附麗之圖初務涵容姑從善罷猶懷缺望重致煩言
其鵠祕殿之隆名尚食珍祠之厚祿服我寬典無忘省
循

万俟卨侍讀制

勅朕深惟治亂之原具載祖宗之訓昭若日星之可仰
信如龜筮之不誣孰與疇咨惟時英傑具官某學貫九
流之富智周萬事之微服在近班望隆專席氣以直養

豈外物之能移問無不知盖前言之多識是用擢侍邇
英之讀進陪經幄之遊方宣室延見賈生朕何取鬼神
之間且齊人莫如孟子爾悉惟堯舜之陳眷乃老成奚
煩多訓

秦梓魚侍讀制

勅朕專用耆哲以廣聰明六經之旨甚深既詳聞其議
論列聖之謨具在則當奉以周旋申錫明綸使之進讀
具官某氣以直養學稱多聞翰墨新功得大手固嘉其

有助國朝故事非舊德其孰能深知遂以言揚豈云次
補用峻金華之列益增儒者之榮問神策建置之因抑
惟蔣又知耳條漢家便宜之實要自魏相發之益勵爾
猷式當朕意

黃應南御史臺主簿制

勅具官某御史府設屬所以維持紀綱必得端良乃應
器使以爾學務真積心存克誠擢在師儒之聯蔚有縉
紳之譽往任鈞檢俾能其官益勵爾為以贊而長

李潤御史臺主簿制

勅具官某朕惟憲府之屬中執法得以自擇蓋欲其以類舉也爾學問操履有聞於時樸茂詳明形於薦牘俾其往任鈎檢儻無諉簿書之勞是為不負所知亦庶幾紀綱之助

汪勃太常寺主簿制

勅具官某列寺設屬皆取時才矧在曲臺之聯尤嚴簿正之職以爾奮繇庠序早有聲稱學博而文官廉而畏

俾任鈎檢宜爾優為往既乃心以贊而長

范洵大理寺主簿制

勅具官某棘寺之屬皆以詳讞為職雖掌治簿書亦惟
其人以爾風力敏彊有聲治縣往任鈎檢固優為也

吳巖司農寺主簿制

勅具官某大農掌倉庾委積之數簿書所總尤劇關防
以爾性資明敏臨事不苟俾任鈎檢人皆謂宜往究乃
心以求會計之當

曾怡太府寺主簿制

勅具官某司府實財用出納之地吏多並緣惡其籍之
害已惟時簿正可不擇人以爾儒雅自將綽有家法往
任鈎檢其劇關防毋為朱墨之徒勞要使公私之有攷

林文仲太府寺主簿制

勅具官某外府之屬以出納為職雖掌治簿書亦惟其
人以爾才能敏彊臨事不苟往任鈎檢其殫乃心

李文中太府寺主簿制

勅具官某外府號稱繁劇凡邦用之出納貨財之懋遷
繫焉其為簿書衆矣典領之官可非其人哉以爾臨事
明敏見稱詳練往祗厥次益究乃心檢拊吏姦使得去
其害已者則爾責塞矣

陳彥修國子監主簿施堪司農寺主簿制

勅具官某等朕惟寺監簿書所繫甚重鈎檢之職亦惟
其人以爾彥修儒學奮身俾主胄子以爾堪吏能精敏
俾主大農各因其能毋曠厥職

畢良史進春秋正辭并通例特改右承務郎制
勅具官某朕惟麟經之作垂法萬世言微而指遠文約
而義詳由漢以來諸儒紛紛各開戶牖橫生戈矛其失
聖人之意多矣唐文宗謂穿鑿之學徒為異同豈不信
哉今觀爾所上正辭通例之書議論精深發明過半有
嘉好古宜被異恩俾從更秩之榮式示右文之勸

鄭剛中復左朝散郎制

勅朕親仁善鄰既展寧親之慶赦過宥罪用覃及物之

恩凡麗丹書悉從昭洗具官某早膺器使服在邇聯入
則才華蔚為臺省之望出則威重遂專川陝之雄頃絃
徵文閱時既久屬茲寬大之澤宜從牽叙之科朕命甚
休爾惟自勵

莫將磨勘轉左朝散郎制

勅言揚德進越等夷所以用人月要日成循資格所以
計治從臣雖吾之親擢考績必付於至公具官某識造
幾微學通今古議論辯博每高專對之能容止詳華式

壯周行之觀頌自冬官之貳擢陞常伯之聯嘉乃靖共
載稽闕閱用申頒於明命俾序進於文階雖有司存為
恩則寵

欽定四庫全書

東窓集卷十四

宋 張擴 撰

制九

王次翁進封長清郡開國侯加食邑五百戶制
勅朕講信修睦克敦大國之盟事親寧神允格一人之
孝惟時碩輔參秉政機屢殫協濟之忠共致中興之治
申頒命緯以渙異恩具官某德厚而氣剛才全而用博
蹇蹇勵王臣之節彬彬稱君子之儒代言綸闈四方不

匿厥指帥屬起部百工咸精其能逮長霜臺寶專風憲
擊姦邪而弗避舉綱紀而必行遂以忠嘉入陪幃幄卒
究和戎之利助成偃革之休是用峻侯爵以增封加圭
腴而衍賦式彰體貌益厚褒嘉噫國有老成朕所親倚
求懿德肆于時夏已著安疆之威示天下弗復用兵尚
急治安之策往竭同寅之志以臻耆定之功

皇叔士崢贈州防禦使追封濟陽侯制

勅生有爵祿之寵歿有贈襚之章馭臣之方古今一體

矧予宗屬可後疏恩具官某法度持身夙夜匪懈久居
環衛靖共弗渝胡不憇遺遽傷淪謝侯封使範併示哀
榮尚其有知歆此休渥

王貴除侍衛親軍步軍指揮使添差福建路副
都總管制

勅典禁旅之嚴內則資其扈衛總兵符之重外則薄其
威名魚此異恩屬吾驍將具官某早親行陣素習韜鈴
撫衆甚寬列營馴其號令臨機必果彊敵避其鋒稜屢

收斬獲之功方倚訓齊之政胡抗章而自列遽引疾以
為辭載疇盟府之戰多參領甌閩之軍律仍陞侍衛之
職以壯董兵之權服我寵榮毋忘報稱

田彥宣承襲銀青光祿大夫檢校國子祭酒知
京賜州魚監察御史武騎尉充東路都誓首制
勅具官某朕疏厚典以懷遠人爵秩土疆聽其世襲以
爾父久於撫御備罄忠勤遽以疾辭請延其嗣參稽故
事昭錫贊書皇靈所加種落自附益恭臣職毋墜前修

吳秉信除樞密院檢詳諸房文字制

勅具官某西樞宥密之地設屬以糾稽違蓋視文昌左右司東西臺檢正之員也其選可謂重矣非疏通明敏之士孰膺是選哉以爾學博而知方智周而行遠奉常議禮起部為郎俱以能稱揚於在列往贊本兵之寄益殫事上之忠

徽猷閣直學士左朝奉郎提舉江州太平觀唐
煇父述封右承議郎致仕制

勅上詞同具官父某抱材不試積德甚豐早嚴教子之

方晚饗安車之適貴通朝籍榮動里閭茲因大賚之恩
用陟文階之寵服我休命益介壽祺

宗室居禮特補右內率府副率制

勅爾以宗室近屬錫名授官蓋國家舊制也副率雖卑
恩則厚矣尚勉之哉

劉光世贈太師制

勅知命為賢死生何殊於夜旦念封有禮哀榮欲極其

始終愴子勲閔之英忽動鼓輦之威宜頒祿典增賁隆
名具官某沉鷙有謀純誠自信果敢挾萬夫之勇間關
收百戰之奇早推梟將之雄式付中權之重能擒能縱
得兵家韜略之餘且守且攻出敵人籌畫之外嘉恩威
之魚濟致功業之彌隆制閫節旄屢疊齋壇之組清都
香火久安真館之游屢形引疾之章俾遂言歸之志方
高得謝遽駭云亡念凌煙之舊勲當垂不朽加維垣之
一品追耀無窮尚想凜然歆此殊寵

孫渥贈節度使制

勅朕念爪牙之臣厚始終之禮聽其謝去方撫髀以興
嗟胡不慙遺遽蓋棺而永已豈無愍典以永異恩具官
某早有威名聞於士伍負陷陣摧鋒之勇所向無前推
臨機料敵之明有攻必克比宿師於利閭尤謹備於邊
陲忽駭訃音忍披遺奏悼爾素志每懷馬革裹尸之忠
渙予恤章豈後齋壇授鉞之寵尚幾精爽歆此哀榮

武德郎元成贈三官與三資恩澤制

勅具官某爾以忠勇隕身行陳閱歲滋久朕豈汝忘進
秩恤孤並厚存歿

張漢彥除戶部員外郎制

勅具官某版曹之職號稱劇繁雖出納之各付諸有司
而經理之方允賴能者惟時郎吏斯取通才以爾智足
知幾學非泥古愛人利物策素定於胸中足食生財語
豈專於紙上其為朕講求民瘼疏濬利源夙夜惟勤往
助而長

劉彭年贈遙郡刺史制

勅具官某視死如歸義莫先於徇國施恩不泯禮尤厚
於褒功以爾頃預干城恪於守職披堅執銳陷陣摧鋒
卒殞其身有嘉乃節州麾之任品秩惟崇用昭錫於恩
章以增光於泉壤諒茲精爽猶克欽承

翟琮贈承宣使制

勅朕以禮厚下哀亡如存矧吾敵愾之英可後卹終之
典具官某臨難思奮視敵如讎國爾忘家捍阽危之孤

堞父詔其子成忠義于一門胡不慙遺良深悼歎其陞
留務之秩示為衆戶之光尚幾營魂歆此殊寵

王繼先轉遙郡承宣使制

勅禮隆宮壺恩及外廷凡爾服勤之人咸蒙增秩之賞
具官某善於擇術仁以存心雖隱於醫蓋進乎技屬掖
庭之有慶舉令典以旌勞其奉綸言之華遙膺留務之
寄益思自勵以稱所蒙

李寶節度使制

門下率貔貅而遠討獨高靖海之功鼓鐘鐔以凱還宜
懋策勲之典睠予良將克著顯庸有光盟府之藏爰峻
齋壇之拜誕敷命綍徧告廷紳左武大夫宣州觀察改
添差權發遣兩浙西路馬步軍副總管江陰軍駐劄李
寶氣勁以雄才全而果結髮而與敵角勲收百戰之多
執戈而為士先勇冠萬夫之表維茲邊釁啓自敵人棄
好背盟殘民逞欲萃干戈於淮甸方深窺伺之圖潛舟
楫於海堧欲肆包藏之計廼授成於虎旅俾遐陟於雲

濤忠誠仗義而鼓行豪傑間風而響應千艘水擊威名
遠繼於伏波萬舸灰飛偉迹更高於赤壁俘獲靡容於
數計招降何啻於千羣一空虎穴之屯永息鯨波之湧
第功居最錫寵宜優啟巨屏以建旄分諸道而置使肇
新封爵倍數戶租用壯戎容益昭予眷於戲歌出車以
勞還卒朕方施不次之恩誓擊楫以清中原爾尚建非
常之績往祇顯渥佇奏膚公可特授靖海軍節度使充
浙東西路通泰海州汧海制置使京東路招討使依舊

江陰軍駐劄武功縣開國子食邑五百戶食實封二百戶主者施行

婉儀張氏贈賢妃制

勅正九嬪之儀秩峻宮中之貴綴四星之位禮隆身後之章嗟予邦媛之良嗇彼天年之永爰加贈祿以篤始終故婉儀張氏主璧粹溫芝蘭芬馥懿範可垂於閨壺令德兼備於言容早傳宸闈密扶陰教久恪夙宵之奉頓愆調護之宜遂及淪亡良深悼念遺衣不曳猶彰吾

克儉之風彤管有光足著爾無窮之間具陞極品用賁
幽局尚惟精爽之存歆此殊尤之寵

皇后弟妻錢氏封碩人趙氏封恭人制

勅某氏等禮隆宮掖澤被私門爾以懿親宜同其慶峻
加封號用示國恩

右通直郎監登聞鼓院吳巖母彭氏特封淑人
制

勅昔爾父以清忠直節稱重一時士固願出其門而爾

夫又以文學議論位至從班爾為命婦舊矣不因子而貴也今爾子獻仕於王朝請以一官易淑人之號以加汝夫格令所在朕豈得而私哉然於人子顯親之義或略格令而從之蓋以廣孝也爾其以所聞於父夫者詔其子使知所以事君則爾於榮名將有繼焉

皇后姑吳氏姨單氏並封恭人姊吳氏二人妹吳氏二人並封淑人制

勅具官某氏等禮隆宮掖澤被私門爾以懿親宜同其

慶峻頒封號用侈國恩

晏孝純降右朝散大夫制

勅具官某三尺之律布在有司於讞議能盡心焉則輕重淺深無不曲當爾早習惠文久居憲部差失乃爾罰尚何逃其褫一官以示薄責益思循省務蓋前愆

王綰降左朝散大夫制

勅具官某部使者為天子耳目之官揚清激濁蓋其職也爾在江南官屬不法朝廷命爾核實是宜悉意奉承

具以狀聞而乃顧望遷延淹時不報此而不懲何以示戒其褫一官往務循省

趙令詎降朝散大夫制

勅具官某諸州別駕號按察官其任重矣汙吏受賕事不難見外臺以朝廷之命使爾核實是宜悉意奉承亟上其狀而乃謬為枝蔓往復淹延此而不懲何以示戒姑褫一官往務循省

沈晦降左朝散大夫制

勅慢令弗虔斯忽預防之戒逸囚坐累自干故縱之章
具官某頃帥長沙實臨孔道屬他郡姦賊之惡抵海南
流竄之刑行賄遁逃政當所部爾任按察若罔聞知失
職瘵官咎將誰執姑從貶秩用示薄懲往祗寬恩尚務
循省

李若虛落秘閣修撰制

勅具官某姦人敗謀即申邦憲餘黨附會難追刑章以
爾凡陋本無他能每恣輕儇殊乏素行頃預軍諮之列

專為利祿之圖誕謾不根好莠自口甘奴隸之鄙態曾
市廛之弗為恭成狡鬼之謀卒陷鳴梟之惡論譏之職
叨據何安其從罷黜之科以厭沸騰之議服我寬典益
務省循

秉義郎梁俊彥降一官放罷制

勅具官某征税之利出入浩繁非恃文書無以稽察爾
違部使者之檄輒占匿不遺惡其害已灼見汝姦先褫
一官姑懲弛慢核實定罪尚聽有司

表

代賀撫定燕城表

臣某言神謨默授遠宣中國之威捷布上聞卒定全燕之境脫百年塗炭之苦還諸夏衣冠之華咸竭歡心以歆盛事中賀竊以幽薊列郡漢唐舊封由石晉割以堅甥舅之盟在柴氏僅能舉瀛莫之險盤踞既久運數終窮天啟睿謀勇於薄伐侮亡取亂顯帝王仁義之誅偃武修文混南北車書之會省大農無藝之費革斯民舊

染之汚伐鬼方不淹三年闢敵國何止百里成功可告
曠代未聞恭惟皇帝陛下惟斷乃成以操為驗後不再
舉策出萬全謂以國家觀國家本務可修之德然用隣
敵攻隣敵自收不戰之功親輟輔臣坐康遠俗遂奏凱
旋之樂仍橐弗用之兵臣叨備承流倍深舞手妙燕然
諸將之勒負絕古初奉都護萬年之觴同深慶賀

謝再任興國宮表

臣某言受無功之祿屢閱春秋蒙因任之恩益靡廩稍

重惟叨冒彌切兢慚中謝伏念臣賦分奇窮稟資朴陋
誤齒高華之列宜收老朽之軀豈謂至仁尚憐舊物掛
名真館俾陪清靜之祠竊食太倉與享支離之粟茲蓋
伏遇皇帝陛下堯舜制治禹湯用人雖并衆智以為公
常慮一夫之不獲致茲冗散未遂棄捐臣敢不益勉勵
於初心用堅持於晚節煖衣飽食永懷雨露之私粉骨
碎身誓答乾坤之造

謝賜上尊號不允詔冊表

臣某言顯號鴻名謳歌交上溫詞睿訓謙抑未遑具載
成編灼知至意分頒遠服與有榮觀中謝竊以堯帝之
無能名厥勲惟大文王之所以聖其道甚神凡閔休偉
績不可形容則伸紙濡毫詎能稱述欣逢上聖治冠百
王以兵寢刑措為極功以禮備樂和為盛舉天地寧謐
山川懷柔洎萬物各得其宜無一夫弗獲其所梯山航
海四裔咸賓芝草嘉禾諸福畢至眷言燕薊久陷契丹
天戈所臨輿地盡復快祖宗之宿憤混南北於一區宜

有徽稱以超曠古羣章競奏自忘刻畫之不工優詔弗
俞始信高深之難議恭惟皇帝陛下聰明睿智聖神武
文躬舜治之無為蹈禹功之不伐特示謙德用廣孫謀
集一代之彌文命百僚而申錫臣叨分郡寄獲奉宸音
頌德歌功已愧煩言之無補泥金檢玉終期大禮之必
行

移河北運副謝表

臣某言俗吏便文既乏平反之譽書生謬論何知輸漕

之方易節雖榮撫躬甚愧中謝伏念臣智難治劇學昧
適時屢玷使令漫糜廩給訖無裨補少答恩私錄其曠
職之尤合在黜幽之列豈意錯節盤根之選更用汙牆
朽木之材矧此瀕河正當孔道方朝廷欲備邊而實塞
宜州縣各協力以濟功必使芻粟裕饒能足重兵之食
庶幾仇讐殄滅可期數月之淹責任如此其難報効以
何為稱茲蓋伏遇皇帝陛下聖神天縱勤儉性成辨忠
邪如龜鑑之明用賞罰若權衡之信交修政事博選賢

能尚憐樸忠俾與煩使臣敢不恭承睿訓旁布湛恩用
竭疲駑少收尺寸舟車熟便雖未曉阜通之宜金穀幾
何或粗知出納之數

代除樞密謝表

忽奉綸言進貳樞筦仍特加於異數俾盡免於常儀眷
冒併優忝營滋劇臣中謝伏念臣材器謏薄問學迂疎
遭遇盛明揚歷華要無涓毫可錄之效有丘山未報之
恩方積愧於空餐將力祈於外補敢圖眷獎復預詳延

專使及門莫展循牆之避衆賢在列豈逃充位之譏恭
惟皇帝陛下追述先猷勵勤庶政隆堯舜之孝弟擴文
武之憂勤博求時材協贊邦治廼容辱陋亦被褒揚臣
敢不忠恪赴功靖共率職乾坤亭育顧難紀於曲成日
月照臨誓永堅於補報

代吳樞密辭免表

臣某言入貳鸞臺已慚非據進長樞府復誤眷求授受
弗厭公言懇辭敢避重責竊以位峻近弼政掌軍符外

制邊郵中專帷幄宜得英髦之士以當委寄之權伏念
臣樗櫟散材斗筭小器早逢休運屢陟禁塗瑣闥論思
每愧謀猷之無補金鑾潤色益慚翰墨之不工偶值飛
龍在天之辰濫陪羣鷺振羽之列首膺大用驟躡羣倫
未聞旬月之間略效絲毫之末夫何恩幸復爾超踰且職
在本兵是為出將入相之選而時當用武宜取運籌折
衝之奇猥及孱微豈容緘默伏望皇帝陛下奮乾剛之
斷運離照之明曲回淵聽之聰追寢綸言之誤博詢中

外改授忠良自然名器無假人之嫌益班珉玉庶幾功
勲可指日而俟少裨丘山

謝耕藉詔表

臣某言謹耕藉之辰躬嚴盛禮頒飭農之詔惠徧多方
久被照臨惟深抃蹈中謝竊以先農之祀詳載諸經秉
耒之章信稽於古所以示敦本力田之勸蓋將為愛民
利物之先允屬熙朝率循故事聖心惻隱既舉三推之
儀天語丁寧更下十行之札誕敷率土咸服深仁恭惟

皇帝陛下舜德文明禹躬勤儉申飭國典不違民時自然百穀之用成豈有一夫之弗獲臣叨膺郡寄恭佩訓詞易耨深耕雖識老農之政煖衣飽食實慙循吏之風

代京畿監司稱賀欽宗皇帝即位表

臣某言先京師而施德本繫衆心佑下民而作君遂膺大命慶由近始懽與誠均恭惟皇帝陛下仁孝日躋聖神天縱光明而輔之學勤儉以律乃身華夏咸歸廟社有託南衙之親政事益嘗歷試諸艱斧辰之垂衣裳所

謂無為而治臣叨將使事獲望宸光有開必先既識興王之運克昌厥後無知過歷之祥

徽宗皇帝上僊慰表

臣某言沙漠地遙稍闕問安之報臣民罪大遽興永訣之哀凡屬照臨惟均殞滅恭惟皇帝陛下純誠內蘊達孝生知適丁國步之艱難誕受皇圖之付託雖卑詞厚幣祈有請於上天然清蹕和鸞卒弗還於仙馭遭此非常之變幸寬罔極之悲臣奔赴莫遑哀摧待盡未有無

父之國顧何責於他人不共戴天之讎願弗忘於寢食

代黃侍御謝除直秘閣表

臣某言有司營繕敢緩奏功延閣高華遽膺疏寵恩踰
涯分愧極凌兢中謝伏念臣素乏先容曾無他技頃從
罪廢復被使令茂有補於絲毫已數霑於雨露如鳩工
賤事實人臣效職之常而寓直隆名豈俗吏積勞可致
適當錄用咸出親除猥及庸虛最為僥倖茲蓋伏遇皇
帝陛下任賢勿貳御衆以寬雖名器未始假人於事功

或先信賞不間微勞之錄遂頒褒詔之榮臣敢不仰佩
訓詞俯循分守田園可老志已厚於乞身溝壑未填義
終期於報國

代京東西路提刑謝除直秘閣表

臣某言御命近畿督姦為職疏恩延閣得寵無名微倖
實多凌兢為甚竊以寓直冊府比榮瀛洲厥選高華用
圖俊傑如臣至賤終老無能豈容誤列清流輒敢上干
公議矧潢池囁聚初由所部之失防而天戈掃除何但

小臣之出力遽頒優賞猥及罔功茲蓋伏遇皇帝陛下
位事惟能使臣以禮如天地之育萬物本出無心雖犬
馬之有微勞未嘗不錄遂令庸懦亦被褒嘉臣敢不仰
佩訓詞俯循分守絲毫無補志已厚於乞身溝壑未填
義終期於報國

代處州謝賜大成殿額并監書表

臣某言廣殿揭名增嚴師道羣書分帙丕闡人文方伸
控告之詞遽拜逾常之賜寵私多士歡格衆心中謝竊

惟勸學之誠實繫承流之責原德行道義以立教非簿
書米鹽之同科士從城闕之遊詩譏鄭伯化行巴蜀之
陋史牘文翁眷此小邦比更强敵倬然輪奐之美興於
煨燼之餘獨賜額有待於睿旨之頒而載籍尚須於有
司之給豈謂俯從衆欲併自深仁恭惟皇帝陛下天縱
多能學由古訓大成集夫子之道叢編魚百家之書遂
俾遠方均蒙美化煌煌奎畫頓還舊觀之神明秩秩牙
籤孰識六經之簡易臣仰承至意伸喻下民庶幾目擊

而道存不必家傳而戶曉能修泮水顧魯侯初本無功
咸通孝經雖羽林猶知向善

代賀元會表

臣某言元正首祚聿修來會之儀廣殿稱觴咸拜履新
之慶事循典憲歡浹神人中賀恭惟皇帝陛下辨色以
朝嚮明而治踵玉帛於萬國興禮樂於百年容貌采章
有輝庭燎窮荒絕島悉獻地圖臣職守銅符神馳魏闕
百官以正莫陪鷺集之班萬壽無疆徒竭嵩呼之賀

代處州謝賜大晟樂表

臣某言比及羽旄肇新百度將以鼗祝下逮諸侯與聞
鏗鏘之音咸中舞蹈之節中謝竊以樂由天作初不自
於人為聲與政通或可觀於治道雖本之情性而無偽
亦參諸律呂以成文斷自聖神炳然制作恩從御府惠
徧藩方眷此小邦頃遭強敵政新音之未嗣宜衆器之
申頒茲蓋伏遇皇帝陛下堯仁如天舜功協帝子羽之
舞可格有苗之頑咸池之音不愧洞庭之奏達之天下

示以人和臣叨領郡符獲親聖制食肉而忘其味喜甚
聞韶無德以加於民賞慙進律

謝轉官表

臣某言有司考績著在典彙庶吏累勞馴陞品秩恩踰
涯分愧極面顏中謝伏念臣猥以非才誤膺煩使信天
資之推陋迷俗學之迂愚粗知蒞官行法之方蹈茲繩
檢未有足國裕民之策豐彼貨財方懼罔功敢言冒寵
茲蓋伏遇皇帝陛下中興王室博用人材念事業之欲

及時宜賞刑之必貴實如天地之育萬物本出無心雖犬馬之有微勞未嘗不錄臣敢不靖共自守黽勉為懷誓殫小臣之私仰答大君之賜

謝賜厯日表

臣某言以初為常仰稽天運履端於始俯授人時頒及遠方咸知德意中謝竊以璇璣觀象在日月星辰之度不差鳳厯紀元於分至啟閉之候尤謹非推步能撮其樞要則授受或差之毫釐唯聖為能後天而奉豈止舉

行夫故事實亦開悟於斯民茲蓋伏遇皇帝陛下剛健
法乾昭融如日居成功而弗恃格有孚於未占遂嚴正
朔之頒以示邇遐之信臣敢不虔恭以守兢慎而行鼓
舞靈風但稟神明之布令出入阡陌更知勸課之及時

又

臣某言歲月日時無易天以人占治教政刑始和下從
上令用頒寶歷申戒彛章凡暨有邦咸德其賜中謝恭
惟皇帝陛下至誠盡物之性內直與天為徒春賞秋刑

順陰陽而為用聲律身度如權量之不公昭示王正克
修祖武內以謹日官之職外以孚海宇之情臣叨領郡
符仰承德意履端舉正莫窺天下之至神作事厚生猶
識古人之大戒

廣德軍到任謝表

臣某言民社之託本屬循良擣櫟之材誤膺寄委初見
士吏有覲面顏中謝伏念臣蒞官無以踰人泥古不知
為政謬更器使殊乏寸長顧雖小國寡民不多於訟訴

然以薄才綿力何有於事功茲蓋伏遇皇帝陛下體道
無所不容責人弗求其備如父母之憐子豈棄無能思
犬馬之捐軀自圖報效臣敢不恭承德意恪守官箴倘
未能倣循吏之為勤於撫字終不敢肆庸人之擾干厥
典刑

提舉兩浙市舶到任謝表

臣某言總百蠻之珍式裨大計分一路之寄猥及菲材
恩誤使令情深戰懼中謝伏念臣株愚自用椎鈍有餘

習成泥古之迷識昧趨時之變如漢蕃互市安能曉阜
通之方而泉貨交關或不詳出納之數冒榮如此圖報
謂何茲蓋伏遇皇帝陛下至仁如堯大智似禹天臨萬
物器使羣倫雖筦庫必自任其能故賢愚亦各當其分
遂令謫薄寢與選掄臣敢不寅奉詔條恪遵職守疲駑
自竭尺寸是圖雖慙無濟劇撥繁之材見稱能吏猶可
舉長財善物之令申戒攸司

謝除中書舍人表

臣某言伏奉告命授臣試中書舍人仍賜章服者載筆
螭坳已慚非據代言鳳掖洊被褒陞懼寵任之難勝愧
懇辭而莫獲伏念臣空疎寡學梗野無文奮繇庠序之
諸生進預簪紳之華貫一昨召從外服屢沐優恩東觀
冒榮茂著汗青之效南宮備數闕聞起草之工寢膺言
動之司遂攝絲綸之職凡委任必關文字顧盛名何取
芻蕘念已試之罔功技止如此遂忘歸於久假士者笑
之俯量妄庸有誤褒擢茲蓋伏遇皇帝陛下智臨萬物

器使羣材任官必因其能每循名而核實責人不求其
備亦略短以取長致茲迂愚濫被甄錄臣敢不撲忠自
守窮老益堅雖慚溫厚之詞莫追前哲尚竭糜捐之報
不負初心

謝罷中書舍人表

臣某言虧靖共之操自速顛隳荷寬大之恩祇從罷黜
罪深責薄感極涕零中謝伏念臣本乏寸長誤膺器使
遂班清切進預論思初無補於事功漫糜廩給卒自貽

於悔吝豈免人言未賜誅夷實由仁厚茲盖伏遇皇帝
陛下修明憲度總攬權綱用法從寬責人貴恕如四時
有生而有殺初不容心顧羣下或賞而或刑咸其自取
臣敢不益深思於內訟仍恭佩於訓詞念小人懷私已
之愚永當廢棄惟大君存使過之義尚及糜捐

代謝中書舍人魚侍講表

臣某言習口耳之陋初乏師承侍帷幄之嚴遽叨推擇
懇辭莫遂戰懼惟深中謝竊以上性愈明本由於就學

至人無已善在於取人故博延講讀之英以內輔緝熙之益有如薄伎亦被誤恩茲蓋伏遇皇帝陛下盛德日新多能天縱雖聖若五帝而臣莫及豈待旁諏然保此三鑑而古為先未忘精考用收衆善少贊多聞而臣猥以空疎濫陪清燕念游夏之詞不措何補於經非堯舜之道不陳但堅所守

謝提舉江州太平觀表

臣某言掛名白簡方懷不赦之愆竊食真祠遽受無功

之祿荷恩至厚感涕惟深中謝伏念臣智識迂疎性資
凡陋屢叨晉擢寔冒清華果招自滿之灾亟就黜幽之
典夫何幸會尚在哀憐茲蓋伏遇皇帝陛下日月照臨
乾坤覆載度長絜大并衆智以為公舍垢匿瑕無一夫
之弗獲致茲罪戾未忍棄捐臣敢不俯勵孤衷仰酬洪
造望清光於丹陛昔綴鵷鴻飽紅腐於太倉今同雀鼠
夏祭進銀絹表

右伏以方丘既事禮洽百神列土修誠工魚數品前件

物地効其實婦獻厥功伸嚴助祭之儀用廣充庭之實

天寧節賀表

臣某言誕彌厥月適彰祚聖之符長發其祥申錫自天之祐照臨所及抃蹈惟均中賀恭惟皇帝陛下德配神明恩深動植六府三事罔不奏功四海九州率皆底貢宜介緝熙之嘏用符震夙之期臣屬守偏州樂逢華旦諸福畢至歆成象於太平萬壽無疆竭微誠於善頌

又

臣某言誕彌厥月慶肇一人長發其祥福均四海凡歸
覆燾咸極歡呼恭惟皇帝陛下睿知有臨聰明時乂膺
長生之寶籙襲滋至之天休善教得民悉被無為之化
止戈為武咸歸不殺之仁適丁載震之期用享既多之
祉受命長矣慶萬壽之無疆自天申之嘉四方之來賀
臣遠分郡寄莫望闕庭惟歌天保之詩式繼華封之祝
天寧節進銀絹表


右伏以受命于天永啟興王之運役志于享用嚴修貢

之儀事屬典常責均臣子前件物地之所產時不敢渝
聞中國有至仁偕來慶賀美萬物能備禮願效忠誠

天申節賀表

朱夏方中於赫離明之運至神誕育聿興炎德之符凡
被照臨惟深呼舞恭惟皇帝陛下堯仁兼愛湯政克寬
善教得民坐格無為之化止戈為武潛收不戰之功式
丁載震之期宜受既多之祉邇遐共慶信順交歸臣屬
在庭闡阻趨觀闕望天顏而睟穆莫綴清班祝聖壽之

龐鴻第勤丹悃



欽定四庫全書

集部

東憲集卷十五

詳校官庶吉士臣翁樹培

侍讀臣孫球覆勘

謄錄監生臣章儔

欽定四庫全書

東憲集卷十五

宋 張擴 撰

啓一

賀朱相公除觀文殿大學士宮觀啓

伏審祕殿陞華琳宮均逸禮亦異數示君臣相與之榮
民具爾瞻識忠孝兩全之懿德音初下衆志成孚恭惟
某官道合伊周學醇孔孟議論著龜國體文章黼黻王
言蘊正心誠意之明行尊主庇民之術勉從人望力濟

時艱屢進秉於國均武輔成於帝業文武並用勲名俱
高昨經陟此之悲咸動去朝之念在故事有奪情之禮
矧大臣懷憂國之心秉政期年垂休四海雖不以私恩
而掩公義姑徇衆心然未有仁人而遺其親卒從終制
及茲祥禪申彼彝章惟厚祿所以示念勞之懷惟隆名
所以昭尊德之意并舉盛典武旌耆儒相亦有終大節
已追於前古人惟求舊湛恩實厭於輿情某屬守攸司
阻陪賀客念文王在帝左右必用正人獨裴度繫國安

危即還舊物聊修尺牘莫盡微誠

兩府賀冬至啓

七日來復萌至信於黃宮五福類升召殊休於吉德若
合符節罔差毫釐恭惟某官塞淵秉心剛大養氣坐而
論道允資變理之功入則告猷密贊中和之化方對時
而育物宜視履而考祥某屬守攸司阻趨崇仰慚非史
氏雖莫驗當書之雲嘉與國人獲近披可愛之日

賀趙司諫啓

伏審光奉絲綸入司諫省升在七人之列雅符輿論之
公恭惟某官學造淵源智周事物晉叔向古之遺直蔡
子尼今之正人早以時髦洊躋華貫踐揚滋久聞望彌
隆銓總人材既擅清通之譽主張國是宜專繩糾之司
矧當外侮而內陵政賴予違而汝弼忠良並用廟社惟
休側聞成命之頒咸俟大言之入拳拳顏氏中庸不詭
於衆人挺挺魏謩風烈無慙於乃祖即膺大用式副輿
情某曾侍誨言倍深慶慰拘縻冗職阻造高閣鵬鷃不

羣孰識搏風之便燕雀自喜聊伸賀履之私

賀范待制啓

伏審被恩中禁列職西清旌本朝尊用老成之榮彰聖
君疇咨舊學之美除音初下公論咸孚恭惟某官學術
深醇風度凝遠剛大養氣塞淵秉心早負經綸之才屢
膺清切之選獨殫危悃上結睿知由起從忠義之家自
然有公輔之望典宗支之屬籍名教興行繙史氏之世
書是非曲當以博聞彊識而參講讀之益以耆德碩行

而兼輔翌之崇獨先羣倫寢備數器用真儒而天下無
敵進君子則小人自消簡在淵衷默符衆議遠者懷而
近者悅豈徒士友之交懼鄙夫寬而薄夫敦是宜風俗
之一變某曾親緒論倍激卑悰屬守攸司莫陪賀客所
喜國是無震風零雨之搖更與詞人同北斗泰山之仰
賀知紹興府孟樞密啓

伏審光奉明綸雄分巨屏運籌決勝方資帷幄之謀宣
化承流遽重兵民之寄旌麾所指民社惟休恭惟某官

識洞天人智周事物身兼數器學貫九流早懷經濟之
材出輔艱難之世遂叅國政寔長樞庭兼允文允武之
資善足食足兵之計入而告后既申啓沃之忠出則專
城更效蕃宣之力加隆名所以示餞行之寵擇近輔所
以優卧治之勞一水相望未覺長安之遠千巖競秀坐
專越國之雄某屬守攸司阻陪賀客聊伸尺牘莫盡微
誠

迎張樞密自福州促召赴行在啓

伏審鋒車趣召適遭國步之艱衮衣言歸實解君心之
渴陞華祕殿勸講崇筵姑彰眷遇之隆以示延登之漸
再命而僂恩却堅辭一節以超人爭先覩威名震疊遠近
歡呼雖主聖臣賢而後有為亦天意人謀不期而會恭
惟臬官材無文武學際天人蘊大智不慮之明行真儒
無敵之勇出將入相夷險一心尊主庇民忠良並用頃
冠樞機之任仍提川陝之師強敵屢摧捷音踵至真祠
均逸漫閱歲時審算折衝未忘籌策咸推舊德宜在本

朝況晏安猶先天下之憂豈倉卒不為蒼生而起唐祚
未泯夕引道於汾陽蔡功非難斷乃成於裴度即見介
圭之入覲亟陪宣室之疇咨遂正鈞衡以安廟社某濫
將使指夙荷恩私逖遠門牆屢更歲律用汝作霖雨行
副具瞻必我為鏐鄒敢羞自獻

謝新恩祝先輩啓

伏審日邊淵問筆走風雲仗下臚傳名雄龍虎丹衷自
竭廣譽疾馳言事不愧草茅立身可顯父母恭惟新恩

祕省材高當世學慕古人賢關忠孝之稱孰與何蕃之
高行宣室鬼神之對無如賈誼之少年發策萬言收功
百戰議論不減晁董文章可輩楊盧綽然游刃及之有餘
煥爾盛名之難揜豈但拔犀擢象即看聳壑昂霄某屬
主郡曹曾親眉宇未遑操牘先辱飛緘昔見陸機之文
欲焚筆研今喜馬周之仕素習憲章聊陳燕雀之誠少
歆草木之味

賀陳叅政知湖州啓

伏審得請嚴宸分憂近服輒借疑丞之重少伸師帥之尊霽水可抗覺長安之未遠棠陰故在慰異地之見思卧治無煩令行自屈恭惟某官浩氣直養純誠內融廣大精微如親授孔顏之學雄深雅健初不多崔蔡之文早懷經濟之才出佐艱難之運徧儀禁路叅贊國鈞學而後臣伊尹專格天之美用之無敵仲尼致侵疆之歸暫解繁機出膺外閫以龜鑑廟堂之餘論復糠粃州縣之疲民嘗屑意於區區已得名於赫赫凡樂職中和之

化皆大儒調一之功矧異時魚稻之鄉乃今日股肱之
郡尊鱸登市雅稱澤國之上游山水優賢更託老僊之
補處風流可尚今昔相望某猥以庸虛誤蒙采錄昨滯
江湖之遠每需牙頰之餘雖鳥羽獸皮卒不登於器用
然牛溲馬勃猶未外於牢籠某屬守荒城阻趨崇仞謬
勤絨尺莫既忱誠願計日於及瓜請摳衣於函丈豈但
文章之事附子貢以得聞庶幾名利之心見紫芝而俱
盡

代賀婺州范龍圖啓

伏審祗膺宸綽進直河圖屢分名數之優增重藩宣之
寄庇庥所及歆豔為多恭惟某官清明持躬豈弟立政
鄭國僑古之遺愛蔡子尼今之正人暫擁一麾亟聞善
最羣偷屏息桴鼓不鳴諸縣豐登襦袴俱有果被司勲
之上賞遽陞內閣之華資佩犢帶牛式副用賢之舉賜
金增秩何慙共理之良某老守一方並鄰千里雖在望
塵之列莫修賀厦之儀徒竭肺肝畧伸毫楮

轉官謝提刑啓

天官考績精及毫釐俗吏累勞艱收尺寸雖繫陞遷之
常格良由調護于平時恭惟某官靖共裨身忠恕接物
平反庶獄民自以為不冤保任衆官士各伸于知己遂
使備員之冗亦叨進秩之華未遑修謁于門墻喜踰識
面聊復寓誠於竿牘愧不盡言

賀中書滿舍人啓

伏審地禁職親莫如西掖言揚德進允屬儒臣宜簡在

于深衷用申頌于顯綽有邦咸喜輿論稱公恭惟某官
剛毅不回清真無撓文章得中和之氣豈尚浮詞謀謨
行正大之言實追前哲早懷王佐之學出遇聖明之時
驟歷華塗寢居言責每于崇論宏議初未嘗枉尺而直
尋及其原始反終蓋皆是尊君而親上屹如砥柱障厥
狂瀾念忠盡之不誣宜論思之是賴遂承雨露入掌絲
綸願敷噩噩之文用塞洋洋之耳大手筆則稱燕許超
冠一時言制詔者推楊常蒲符公議即膺大用式正羣

倫某逃遠門牆屢移歲律阻陪下客與瞻荷橐之羽儀
默想九重將啓金甌之名姓

賀中書任舍人啓

伏審被命中宸升華西掖儒學尊用彰本朝之清明王
言時孚致四方之聳動多士相慶有國惟休恭惟某官
操行端方風度凝遠剛大養氣塞淵秉心探六經之蹟
而論不詭于聖人掇百氏之英而文獨高于作者早由
民望出濟時艱慕前賢難進易退之風行當世激濁揚

清之義父書熟讀豈徒手澤之存國是不誣宜在汗青
之選昨賜還于真館固雅意于本朝屢竭嘉猷式當審
意漢文思見賈誼問豈專於鬼神齊人莫如孟軻言必
陳于堯舜遂承雨露入掌絲綸以雄深雅健之詞處潤
色論思之地大手筆則推燕許超冠一時言制詔者稱
楊常蒲符公論即膺巨用式贊洪鈞某伏讀除書欣聞
盛事阻陪賓客雜珠履以前趨黜想姓名覆金甌之將
啓

賀中書胡舍人啓

伏審被命中宸升華西掖儒學尊用彰本朝之清明王
言時孚致四方之聳動多士相慶有國惟休恭惟某官
操行端方風度凝遠剛大養氣塞淵秉心稟彊識博聞
之資深造前賢之閭奧明大中至正之道獨障邪說之
橫流夙負經綸之才屢膺清切之選昨陞柱史表用正
人顧遭逢願治之君首開納有為之論不恐少屈示尊
所聞念去國者七年已循牆于三命及還舊物益罄丹

衷進君子則小人自消用真儒而天下無敵遂承雨露
入掌絲綸以雄深雅健之文處潤色論思之地大手筆
則推燕許超冠一時言制詔者稱楊常滿符公論某欽
聞成命喜越稠人屬守攸司阻陪下客未識紫芝之面
蘇源明固已懷慙將登元禮之門孔文舉豈容無說

賀張參政經筵啓

伏審召從方面亟承帝命之休入侍金華式解君心之
渴除音初下衆志咸孚恭惟某官道合伊周學醇孔孟

真儒無敵大器晚成兼允文允武之資蘊至大至剛之
氣勉從人望出濟時艱讜議明謨嘗著龜於國論高文
大冊定黼黻於王言頃辭機務之繁出寄蕃宣之重仁
聲所暨民頌惟休雖虎節熊轡用綏懷於遠服然袞衣
赤舄宜增重於本朝果被絲綸入參帷幄天下咸推其
舊德聖心式佇於嘉猷豈徒彰眷遇之隆亦以示延登
之漸遂端百揆以正萬邦某逖遠門牆寢移歲月限拘
冗職阻詣高閣注目旌麾莫遂望塵之拜寓誠竿牘聊

仲賀厦之私

回德興陳宰啓

伏審被命中宸牧民劇邑車音至止士論翕然恭惟某
官學問談通風猷敏劭傳家素業既克紹於箕裘試吏
長才顧何難於根節佇聽鳴琴之政遂頒增秩之恩某
衰病餘生親依大庇即候旌麾之入用修桑梓之恭欣
幸之私敷宣罔既

回巢縣湯承議啓

伏審入國問俗望徒屬于德公事賢友仁禮未修于孺
子遂蒙往教深服撫謙恭惟某官杞梓良材圭璋令器
博聞彊識朝論推先茂實英聲士心畏仰久勞州縣之
職未厭簪紳之言坐聞淮壖均沐仁政出宰百里雅高
赫赫之名報政三年即書上上之考某屬拘守土莫獲
踵門徒佩箴規之切磨如聆親炙之謦欬

回饒州王舍人啓

伏審祇奉絲綸雄分屏翰借一時之舊德泣千里之良

民旌麾甫臨士卒交慶恭惟某官學窺聖奧名重儒先
入侍殿坳直筆允推于南董出臨藩服仁聲遠繼於龔
黃洵膺鄒水之符即聽鋒車之召某頃嘗親炙誤辱記
存所喜觀瞻共獲披雲之快獨憐老病未忘蒙霧之私

回德興汪尉啓

伏審拜命明庭效官劇邑車音至止士論翕然恭惟某
官負康濟之才蘊淵源之學見推多士峻列賢科官卑
未免於抗塵家便不妨於將母賊曹况自不惡早聞部

曲之令嚴彩棒行復可懸始信神僊之吏隱某未遑修
問先辱貽緘久懷蒙霧之私即遂披雲之幸

賀蘭侍御啓

伏審祗膺宸綍擢正臺端符公論之所推旌直言於已
試淵衷簡在衆志咸孚恭惟某官操行端方風度凝遠
剛大養氣塞淵秉心彊學待問則左右逢其原修身踐
言則從容中於道慕古人難進之節懷君子勿欺之忠
早立王庭志不關於聲利徧儀朝路神益介於靖共昨

自霜臺暫休琳館旋被鋒車之召入參卿寺之華密啓
嘉猷遂當睿意惟南榻總風憲之任於天子為耳目之
司倘非博聞強識之才孰在激濁揚清之選欣聞遴東
允屬老成廟社均休華夷率服搏風勁翮共觀排擊之
鷹鷂當路清塵豈有縱橫之豺虎遂膺大用式正羣倫
某屬守郡符阻趨賓廡喜而弗寐方側耳於鳳鳴言不
成文聊伸毫於鶩賀

賀范內翰啓

伏審光奉絲綸入專翰墨黿禁舊稱內相陋有司可雜
他才天子倚為私人如上帝別開官府登用儒學尊榮
朝廷公論所推有口皆慶恭惟某官道大而德博心正
而意誠識天地之純全探聖賢之微隱發為言行著在
詞章挈是非褒貶之權衡立治亂興亡之龜鑑近主盟
於後學遠追續於前人故著書以孔孟為宗師獲由古
訓而作史若遷固之父子法本家傳煌煌從橐之羽儀
表表士林之領袖踐揚既久眷遇彌隆召從內閣之華

進長金鑾之直密叅帷幄間侍謀謨豈惟潤色之稱工
實亦論思之多助初見一時之號令還追上古之風流
文成口占將脫玉堂之吏腕詞與意會驟感山東之士
心默數本朝居多手顧才雄於一代號世掌者幾人
側聞雨露之頒咸喜箕裘之紹夜陪清燕孰驚蓮炬之
還名簡淵衷即報金甌之啓某謬當任使辱在記憐所
幸衰年屢觀盛舉尚阻門牆之謁徒勤竿牘之修雖闕
然雞鳴狗盜之間有喙三尺猶瞠若墨卿楮生之後時

見一斑

朱內翰通問啓

鼇禁職親獨以私人而視草龍門地峻誰為下客以樞
衣緬慚蒲柳之餘曾掛齒牙之末侵尋歲月迫隔江湖
雖貴賤之不侔豈寒溫之可廢輒忘固陋上瀆威嚴庶
仁人有取於堂下之言使俗吏得以見胷中之意恭惟
某官道窮聖域名重時髦北斗泰山仰高明於衆目太
羹元酒薄滋味於斯文宜聖君於投戈誨藝之時訪舊

學於誠行邪辭之後思廉正色而士氣奪豈尚空言仲
尼在朝而侵疆歸寢圖遠効益潤色論思之既久則彌
縫啓沃之滋多雖海內舉知其為師儒之宗於禁中實
賴以裁軍旅之事言求諸道自堅匪石之忠善則稱君
誰見補天之力即膺詔命入贊機衡選衆而舉伊臯遂
契帝心之簡恥君不及堯舜更觀王佐之奇某猥以薄
才例乘一障昔曾侍夫子雖文章之事庶幾可聞然不
見紫芝顧名利之心若為俱盡玉堂多暇暑氣方熏願

言調護之精式副倚毘之重

賀侍講胡內翰啓

伏審光奉絲綸入司翰墨禁中舊稱內相非龕官可雜
他才天子倚為私人用真儒所謂極選交歡多士增重
本朝恭惟某官塞淵秉心剛大養氣學淹墳典識洞天
人造至道之奧間而言不詭於聖人障邪說之狂瀾而
文獨高於作者早膺睿眷入與英游移風俗而厚人倫
雅推常德斷國論而謀王體咸仰嘉猷峨峨軒陛之羽

儀耿耿國家之藥石代言西掖渙號令於風雷勸講金
華證古今於龜鑑召自貳卿之峻密專視草之榮豈徒
潤色之稱工實亦論思之多助審言之文壯麗得屈宋
僅作衙官畢誠之議詳明知頗牧已歸禁籞遂參大政
式贊洪鈞具屬守攸司阻趨崇叔夜陪清燕孰驚蓮炬
之還名簡淵衷行慶金甌之啓

宰執賀正啓

嶰管飛灰聿新歲律日官頒歷欽授人時當品彙之咸

亨宜仁賢之有慶恭惟某官道高輔弼澤被華夷蔚然
社稷之名臣膺此國家之重寄履端於始既克濟於猷
為何福不除武交歸於信順人心所向天聽弗違某屬
守小邦阻趨崇伋莫陪衆客進稱難老之觴但與有司
均奉始和之令

宰執賀正啓

歲時謹令送寒氣於土牛風俗從宜介眉壽以春酒肇
啓王正之吉默迎神貺之休恭惟某官塞淵秉心剛大

養氣對時而育萬物咸遂其宜作善以降百祥各推其
類宜集惟心之慶式彰難老之符人心所期天聽不遠
某叨將使指阻詣賓閣雖莫陪旅進旅退之儔竊私懷
善頌善禱之請總三百六句之數於此履端書二十四
考之勲自今其始

知州賀正啓

嶰管飛灰聿新歲律日官頒歷欽授人時當品彙之咸
亨宜仁賢之有慶恭惟某官溫恭立德平易近民稔聞

千里之懷仁豈待期年而報政履端於始既克濟於猷
為何福不除式交歸於信順某屬拘官守阻詣賓閣輒
傾頌禱之私聊寓緘滕之末

賀運使李學士啓

伏審祗膺宸綍擢領漕權名在蓬山先生浙部恭惟某
官學通世務望冠時髦梗楠厦屋之材瑚璉宗廟之器
中正自守無施不宜要劇屢更所至稱治頃被承宣之
寵久專屏翰之雄恩威流行士吏帖服就陞使節總裕

民財以吳越之封疆舊稱繁富非管蕭之材畧孰任幹
旋卽見錢流遂膺環召某叨分符竹獲仰旌麾未親眉
宇之溫已幸德風之偃聊伸尺牘莫旣微誠

又除直祕閣謝運使啓

伏以偏州營繕敢懷擇事之私延閣高華遽被念勞之
寵在叡明雖須賞勸於朽鈍猶是誤恩蓋築室賤工不
必賢有司乃能就緒而第功優課良由部使者樂於成
人恭惟某官靖共禔身忠厚接物頃將使指出按列城

存好賢予善之心用畧短取長之術優於保任致此超
踰踵唐賢圖繪之榮已慙非據念道州催科之拙尚賴
曲全姑叙情誠莫伸報謝

賀趙參政除樞密都督川陝啓

伏審光膺明命寵被元臣進長樞庭雄開督府朝無闕
政方寬黼黻之憂國爾忘家遽啓元戎之乘用真儒自
然無敵致四方敢不咸懷恭惟某官持躬清明養氣剛
大學王者事為君子儒重德鎮浮稟河山溫厚之氣赤

心自許應國家艱難之時頃由風憲之司入贊樞機之任嘉猷屢告睿眷彌隆始坐鎮於長江屢申威於遠服載叅國政未閱歲華謂在帝之左右罔匪正人則自陝以東西宜有行者除音初下衆志咸孚倘非陳借箸之奇何以重登壇之拜冠本兵之地名數益崇督諸道之軍川塗並進先聲所暨強敵自窮豈圖三捷之功蓋舉萬全之計決勝千里雖藉畱侯發策之良無踰老臣亦自充國請行之銳某欽聞成命喜越稠人不期垂老之

年尚見中興之舉用汝作霖雨行慶召還必我為鎬鄒
敢羞自獻

賀石殿院啓

伏審光膺宸綽擢副臺端符公論之所推信嘉言於已
試善惡有考自然國是之彰名分益嚴豈復官邪之敗
交懽多士增重本朝恭惟某官清明持躬剛大養氣據
經引義論不詭於聖人咀英茹華文獨高於作者早由
時望游歷要塗專講席於成均詞無邪詖校羣書於冊

府學有師承涵泳既深聲猷彌劬果膺眷注寢被東求
惟御史耳目之司實天子紀綱之地獻可替否如龜筮
之不誣激濁揚清如鷹鷂之獨立忠良並用廟社惟休
側聞成命之頒咸饗大言之入某限拘官守阻詣賓閣
竊符輿論之歸驟見正人之用喜而弗寐方屬耳於鳳
鳴言不成文聊寓誠於燕賀

賀玉殿院啓

伏以繡衣持節久欽八俊之威名記室滕緘忽奉五雲

之翰墨禮雖嫌於往教善或樂於取人猥及非才頓生
榮耀恭惟某官存心忠恕秉德溫柔璞玉渾金世莫名
於器用青天白日人皆仰其清明屢擁使麾式專國計
蕭何任重頗嘗漕給關中劉晏功高如見錢流地上行
被賜環之寵入膺持橐之榮某屬守郡符遯違賓館莫
遑操筆之謹徒辱贈言之溫永為篋笥之光難報瓊瑤
之重

提舉市舶司到任後謝前兩府知州啓

伏以海市分珍式裨國計輜車誤寵寢假使權曾是謬
庸輒膺委使竊以地不愛寶裕然南庫之瑰奇歛弗及
民久矣蕃商之交易昔在承平之日居多增羨之儲偶
遭艱危馴致廢弛欲舉舊政當求通材如臬韋布諸生
桑榆晚景株愚自用椎鈍有餘習成泥古之迷識昧趨
時之變安有善策以來遠人似是馬曹世已譏其疎闊
俾登龍斷事必致於顛躋責任如此其艱報効以何為
稱退量忝冒實有夤緣茲蓋伏遇臬官言合臯陶道侔

伊尹功存社稷名重華夷暫辭機務之繁出任藩宣之
寄博求羣彥協濟中興雖筦庫必因任其能故賢否亦
各當其分遂令謫薄寢被甄收某敢不虔恪奉公精勤
守法稽泉貨出納之吝為簿書漫滅之防雖慙無濟劇
撥繁之材見稱能吏猶可舉長財善物之令申戒攸司
賀戶部李侍郎啓

伏審升華西省曾未淹時擢貳版曹亟聞登用倘非兼
政事文章之美何以供掖垣臺閣之求儒術流行天下

自臻於富庶仁賢信任國中豈患於空虛簡在深衷滿
符公議恭惟某官剛大養氣塞淵秉心挾數器以濟時
全三才而貫道窮廣大精微之學不詭於聖人屬雄深
雅健之文獨高於作者自其卒業於父兄之日早已策
勲於翰墨之場多士推先衆目共驚其聳壑達人委運
十年反墮於積薪流落江湖侵尋齒髮逮真主建中興
之業圖舊人爲共政之基再下鋒車遂持荷橐雖士友
興嗟其晚遇然朝廷喜得於老成典誥深醇實盛時之

帝制憲章明習真後輩之吏師惟胷中素有成謀故意
外俱無難事宜自代言之責遽分足食之憂刻燭占詞
方懼吏曹之腕脫舉鞭授算已驚平地之錢流即贊樞
機式從民望某遯違牆仞寢閱歲時側聞成命之傳倍
越稠人之喜門無畱謁趙趙獨後於賓僚言以見誠猷
骹敢慚於緘尺

賀張樞密再除知院啓

伏審召自遠方行弗遑於俟駕入承溫詔位復冠於本

兵符九州四海之公言彰千載一時之榮遇謀同龜筮
歡決神人恭惟某官謨合臯夔道侔伊呂蘊至大至剛
之氣兼允文允武之資出濟時艱勉從人望頃嘗專將
軍閫外之寄身試其勞力請分天子西面之征事成則
退屬茲彊敵窺我長江敢憑射鵰之雄妄有投鞭之議
廟堂致勝尚渴全籌將士折衝僅傳小捷既下親征之
詔盍圖共政之人方唐宗興當饋之嗟宜謝傳為蒼生
而起矧乃樞機之地實參帷幄之謀而且攻守便宜久

歸經畧蕃漢部曲舊執撫循自應壺漿簞食以迎王師
誰不下馬投戈而拜吾父畱侯輔漢功名卒推而不居
裴度平淮威令亦幾於復振遂端百揆以正萬邦某伏
讀除書欣聞盛舉恨拘官守阻詣賓閣雲滃而興孰識
蛟龍之得志屢成而賀聊同燕雀之懷恩

賀宣州鄭侍郎啓

伏審祇奉明綸雄分近服以忠良之舊德牧凋瘵之疲
民旌旄所臨士吏胥慶恭惟某官風猷敏劭度量閎深

為君子儒學王者事夙負經綸之蘊出逢艱棘之時博
聞彊識而議論不詭於聖人濟劇撥繁而器業特高於
世用握蘭省戶早擅譽於彌綸持橐貳卿更盡忠於獻
納起從真館坐鎮雄藩矧宣城素號名邦於江左尤為
沃壤加以循良之政允資惻隱之仁即觀治化之成旋
奉詔音之渥某叨膺小壘服在下風未遑操筆於門闌
喜踰識面聊復寓誠於竿牘愧不盡言

賀徽州吳守啓

伏審祇膺鳳綽榮佩魚符輔世長民德莫先於愷悌承
流宣化衆共仰於循良旌旆甫臨士民稱慶恭惟某官
才猷敏劭趨操靖共中正自守而無施不宜要劇屢更
而所至稱治宜承密命來鎮大邦陽城之守道州行催
科弗擾之政曹參之治齊國倡清淨無為之風坐使比
鄰獲遵軌則佇聞優最入侍禁嚴某猥以非才誤分小
壘莫陪下客少修執贄之儀徒與數州共獲親仁之寶

賀兵部折尚書啓

伏審祇膺宸綽進長夏官肆求歷試之材用稱久虛之
選交懼多士增重本朝恭惟某官塞淵秉心剛大養氣
內蘊濟時之畧外彰華國之文懷近臣諫行言聽之忠
必稱堯舜挾上將戰勝攻取之策暗合孫吳昨啓戎行
屢專師閫旌旗改色草木知名宜膺眷顧之恩亟奉賜
還之詔貳卿起部百工咸精其能承命樞庭四方弗匿
厥旨遂班常伯式正羣倫表國家多用於忠良示官府
交修於綱紀豈但五符尺籍各有司存要知三畧六韜

悉歸度內旋膺大用入贊洪鈞某伏讀除書欣聞盛事
莫陪下客雜珠履以前趨徒想盛名覆金甌而將啓

賀程發運啓

伏審召從蕃服簡在一人寵以使權雄魚數路復祖宗
百年之基業建國家萬世之規模成命初頒有邦咸喜
恭惟某官學該墳典識洞天人智術精深材猷敏劭刺
繁治劇臨機無畱刃之難考古驗今遇事若提綱之易
早從民望出濟時艱攬轡登車遍歷外臺之選剖符憑

軾屢持名郡之權服在西清允稱元老豈獨踐揚之滋
久實為獻納之居多是宜旌其盤根錯節之勞付以輓
粟飛芻之任蕭何輔漢頗嘗漕給關中劉晏興唐如見
錢流地上遂聞優最旋奉褒音入贊洪鈞仰裨聖治某
逖違門仞寢越歲時謬分軍壘之符獲綴部封之列愚
而自用媿無一日之長退省其私喜有二天之託

金史四庫全書

卷十五

欽定四庫全書

東憲集卷十六

宋 張擴 撰

啓二

代賀王相公收復朔方遷太傅啓

伏審寵膺異數秩正三公旌周公有衆人所不能爲之
功待伊尹以王者學而後臣之職交懽夷夏增重朝廷
竊惟幽薊之區久阻冠裳之教敢忘大德輒敗信盟肆
興有罪之誅屢上庸公之奏還職方輿地之版見都護

金城之安成師言旋廣殿稱慶疇茲廟算允屬相臣益
輔弼兼文武之材中專密論雖將相制邊陲之命悉
受成謨參稽一時汗馬之勞孰與萬世勲猷之遠發縱
議賞此蕭何所以居功臣之先應變如神非姚崇孰能
成天下之務宜陞師傅之任以尊帷幄之謀恭惟某官
以道佐王推忠許國專冢宰秉鈞之任隆真儒無敵之
名楊綰當朝藩鎮為之撤樂仲尼輔政齊人歸其侵疆
矧當奏凱之辰大啓疇庸之典惟明主論一相禮宜絕

於百僚惟大臣慮四方身不親於細事坐而論道入則
告猷遂正位於三槐以勅功於九鼎某叨塵寄委夙荷
鈞陶慶四方之攸同仰一德之咸有房玄齡善藏諸用
名謝瞭然郭汾陽功蓋一時朝無忌者彌深頌詠倍越
等夷

代黃侍御處州到任謝宰執啓

伏以祗膺宸筆叨奉印章擢從冗散之餘付以承宣之
寄授命弗稱感忤交深竊惟道德之威成安強昔重諸

侯之職郡邑之治本惠養雅高循吏之能矧括蒼之名
區廼少微之分野獄訟素簡賢才居多雖驟更兵火之
殘已純被朝廷之化省刑薄賦潛銷竊弄之潢池佩犢
帶牛益表太平之官府宜得忠良之士助宣寬大之恩
如某者學不適時智無遠慮誤蒙羽翼寢被陶鎔拔之
稠人廣衆之中授以激濁揚清之任初欲明目張膽過
自激昂終無片語隻詞稍可采錄遂致顛踣益重悔尤
莫知婁公盛德之容但慙仁傑奇士之薦洎投閒於真

館更坐耗於太倉豈容齒髮之衰尚分民社之託退量
忝冒夙有夤緣茲蓋伏遇某官師先聖無道威文恥吾
君不若堯舜處心匪石平國如衡當明王交物有道之
時任上臣事君以人之責遂令末路更借一麾某敢不
激勵孤衷講求要術治貴清靜未遑貪赫赫之名政拙
催科頗願書下下之考庶不愧行已之恥以無負知人
之名

代知處州黃侍御再任謝宰執啓

伏以治民無狀初懼黜幽拜命有加復蒙因任宜退而
進得寵若驚深惟列土之封實負承流之寄雖在殊方
遠嶠亦有小國寡民當循名責實之時豈尸祿養疴之
地倘非最課敢議借畱重念某韋布諸生桑榆晚景頃
繇冗散重誤使令效官本無他長為郡安有殊績治貴
清淨徒知避察察之譏政拙催科寧望免下下之考十
萬戶未蒙其福二千石孰以為良既不能效曲阿飾非
以干虛名又不敢如王成矯偽以規顯賞自信尋常之

學妄圖尺寸之功亡補官私浸縻祿廩宜公論去其甚者矧謬政安可再乎假寵自天原恩有地茲蓋伏遇臬官儀刑百辟師保萬民言聽計從體伊尹自任之重功成治定戒周公無逸之難坐銷兵戎不動聲色肆求有德分長庶邦共圖不拔之基豈責速成之效故及瓜而代近雖申戒典刑而報政之遲間亦少紓歲月遂令朽鈍例辱記憐臬自知妨賢何以報國誓殫千慮冀補萬分雖慙無濟劇撥繁之材斷不取因陋就簡之策五日

京兆尹耳自然積毀之頓消三年鄭人誦之萬一去思之可勉

代賀白太宰啓

伏審祇膺宸綍擢冠冢司增重廟堂交歡夷夏竊以主論一相惟圖舊人宰正百官不親細事繫道隆德駿則足以當眷遇之渥非言忠謨嘉則孰能副考績之艱運屬聖時朝多耆德方審厥象而求傳說宜選於衆而舉臯陶豈曰人謀是為天意恭惟某官望隆四海學貫九

流大器晚成真儒無敵徧歷疑丞之位咸推社稷之臣
裴度精神年彌高而德彌劭子儀勲闕朝不忌而主不
疑遂升槐鼎之崇式正鈞衡之重某叨塵委使辱在記
憐聞大老盍歸乎來已深慶賀無一夫弗獲其所尚託
陶鎔

又代賀徐太宰啓

伏審寵膺宸綍擢冠冢司當大人繼明照四方之辰居
上相代天理萬物之職謀同龜筮歡浹神人恭惟某官

言合臯陶道謀伊尹真儒無敵大器晚成盡臣節於三
朝參政機於二府文武並用勲名俱高比鎮北門密專
畱鑰建守在四鄰之固申外護諸將之嚴方朝廷圖任
舊人宜中外推先耆德遂符帝夢入秉鈞衡東山之有
衮衣雖起歸公之戀商巖之作霖雨終諧用汝之謀尊
蕭何善講成規歎房喬兼持衆美坐致太平之業力還
上古之風由周而來七百餘年孰加孟氏書唐之最二
十四考雅俟汾陽某叨與使令夙蒙知遇親逢盛事喜

越常倫鄰哉鄰哉永慶風雲之會人耳人耳敢逃鑪錘之功

代賀起復李左丞啓

伏審祇奉宸綸召還機政事闕廟社之計義斷閨門之恩卿士協謀華夷僉志恭惟某官學通要妙業富經綸曾閔事親臯夔許國早由道德之選入踐綱維之司體貌逾隆勲猷益著獻替係一人之可否用舍為四海之重輕頃罹陟岵之悲咸動去朝之念無人乎大君之側

當議奪情求忠於孝子之門是云舉類惟聖人乃能義
以起禮故天下咸知國爾忘家簡在淵衷特虛舊位宜
謝傳為蒼生而起俟周公以衮衣之歸遂正洪鈞允儀
百辟某逖違門仞寢閱歲時懷婁公厚德之容愧豫讓
漆身之報用汝作霖雨佇觀膏澤之霑必我為鏤鄒敢
避祥金之請彌深頌詠倍越等夷

代賀趙右丞啓

伏審祇奉明綸入陪大政交歡夷夏增重朝廷竊以萬

幾根本於尚書二丞參稽於國柄左綱右轄均謂輔臣
碩德宏才乃副高選惟聖主洽文明之治於近隣加禮
貌之崇凡預登延必親識拔服在二府冠於百僚雖云
侍從之班每因文字而進恭惟某官廟廊柱石國家羽
儀真儒通天地人良史兼才學識早繇翰墨入侍禁嚴
大冊高文溫厚可追兩漢嘉謨讜論都俞不愧九官果
膺側席之求遂正持衡之任某夙蒙知遇獲在甄陶嘗
陪鵷鷺於中庭每嘆麒麟之千里馬周驟用推高論事

之明處約已衰但懷如志之判其為欣戴實倍等夷

代謝周中丞論薦啓

伏以效官無補久愧素餐論薦甚優猥私下品孰料張
季十年之滯遽玷山公一字之知得不待求勞祇以懼
且寒士雖伸於知己而小官或困於謀身凡更相汲引
而仕於朝必預在聞知而得其實豈謂德信未達於義
氣蹤跡素昧於平生而乃陰借吹噓驟如翦拂溢以齒
牙之譽踰於袞繡之榮此殆非俗吏之所能為蓋亦是

衆人之所不識矧中執法以觸邪為職厥選甚高而侍
從官無外交之私靡容苟合宜得非常之彥廼當特達
之知如某者江湖廢人麋鹿與友未能免俗亦漫為官
但知餬口於四方敢愧折腰於五斗屬有東南之役謬
更簿領之繁亡益官私寢移歲月深虞李守或以冗逐
裴琰之敢意晉公乃能遠取白居易退量忝冒夙有夤
緣茲益伏遇某官先生學師聖人行滿天下渾金璞玉
器用莫名元酒太羹文章近古久居風憲之任獨著忠

良之稱舉善無遺待人甚恕下體兼收葑菲先容不問
梯媒遂俾庸虛亦蒙采錄某敢不勉尋舊學益勵初心
未識紫芝雖負蘇源明之恥見稱文舉頓伸禰處士之
狂誓不廢於檢身庶無忘於報德

回溫州舉人啓

伏以獻賢能之書與聞末論揭龍虎之榜喜得英材惟
永嘉望重東南而前輩類高名節逮茲秋賦允契月評
不獨才華可配于古人實亦行義有聞于鄉老恭惟解

元祕省詞尚體要學窮淵源筆掃千人壯春蠶之食葉
文成七步笑老獺之祭魚爭先黃絹之辭妙中青錢之
選臬索居久矣舊學茫然謬持權衡頗眩珉玉初期拔
十得五少厭浮言安知絕倫逸羣盡入公舉滕緘見貺
借譽過情莫報瓊瑤之珍永為箱篋之好感佩之意敦
述奚周

代謝京畿監司奏辟畿令啓

伏以被命公朝得官大邑安有善政式寬疲氓入境之

初覲顏何措竊以縣設令長最號近民漢推郎官乃使出宰其後士論軒輊或云補外之徒勞遂令國勢重輕寢類持衡之偏勝稍欲復古亦在隨時至如許監司嚴辟舉之科固已勝吏部用平配之法矧王畿內附尤非諸夏之等夷而強敵橫侵新致殘兵之抄掠扶傷起廢濟劇撥繁必求剛敏之材始善拊循之術如某者天資椎鈍俗學株愚泥古而不通今聞一而未知二頃嘗負獄官之責亦粗諳法律之文雖一方之民自以不冤然

三歲之課卒無可考遽當百里之寄孰任三年之成茲
蓋伏遇某官寬厚有容剛方不撓人懷愷悌神介靖共
輕軒冕之倘來潔冰霜而自守屢將使指數訪人材故
嘗畧短以取長但期拔十而得五遂令譎薄亦與使令
豈惟有意於滯淹是亦不遺於故舊某敢不周旋三尺
龜勉一心不怠勸課之勤庶補催科之拙人其塗炭近
當取戒於魯山我有田疇後或謳歌於東里誓為報効
非飾虛詞

代黃侍御除直祕閣謝宰執啓

伏以有司任職敢稽營繕之勤命縉疏恩遽被高華之寵功不當賞愧甚于榮竊惟延閣之清名實繫聖明之妙選萃曠古圖書之祕待四方英俊之游自祖宗以來未始假人非文字之優不在此舉如某者天資朴魯世事迂疎鼯鼠之技易窮犬馬之心徒在顧未遑于救過豈有意于言功念茲兵屯安集之初適有廬舍繕完之役恭被詔旨嚴責課程庀徒鳩工僅除風雨之陋行慶

施惠遽沐乾坤之私矧當構用之時尤負冒榮之懼退
量僥倖實有夤緣茲蓋伏遇某官道貫羣倫恩施四海
體伊呂尊君之義懷丘軻利物之心樂事勸功察微勞
而必錄信賞必罰輔明主以有為遂俾常流亦叨異數
某敢不洗心滌慮奉法守公章句腐儒昔雖與校讎之選
簿書俗吏終難陪清切之聯尚冀異時或收報効

代賀何中丞啓

伏審被恩宸扆擢長霜臺簡在淵衷默符公議惟明天

子重風憲之任以中執法為耳目之司所以糾正官邪
主張國是欲在位者無淫朋比德而分職者皆趨事赴
功必得剛明之材乃當彈擊之寄恭惟某官文章典雅
議論深醇早冠儒科遂持從橐晉叔向古之遺直蔡子
尼今之正人果被眷知驟膺倚信善感章疏時人歎其
鳳鳴溫造威名藩將為之膽落即見動搖山岳豈徒訶
問狐狸某夙荷記存倍深慶慰孫處約如志之判行踐
前言張萬福垂老之年更觀盛事

代賀燕大尹啓

伏審疏恩宸宸擢尹帝都名聞一時論慰多士惟京邑
為四方之極素號浩穰而天府居三輔之中尤先彈壓
倘或隄防之不密必致威名之頓傷如趙廣漢鉤距得
情僅能屏息盜賊若雋不疑經術決事廼宜稱重朝廷
材兼古人時得傑士恭惟某官學通今古識洞天人聞
望爭先時髦風流不減前輩出將漕計每見錢流入貳
民曹掄聞貫朽暫借賢於從橐亟總治於神州發伏擿

姦剛果無踰於張敞急彊緩弱威嚴孰比於翁歸即被
褒音遂膺大用某遠分郡寄阻詣賓閣莫與國人共負
神明之畏倘遭田父猶知風化之醇

代賀宇文內翰啓

伏審光奉絲綸入司翰墨弟兄相繼朝野稱公竊以金
鑾玉堂最居禁密王言帝制專取文章無所統屬則擅
私人之榮間待謀謨則高內相之選歷觀前輩均號鉅
公倘非庠序通經之儒孰副朝廷視草之職恭惟某官

材兼文武學貫古今賈誼少年已建三代治安之策柳
渾高見兼識萬里軍戎之情比叅元帥之謀深體淵衷
之念韜鈴未試籌畫甚精方勤贈策之行遽被賜環之
渥審言文詞壯麗得屈宋當作衙官畢誠議論詳明知
頗收已還禁署即見風雷之號令可叅虞夏之典謨某
夙荷記存尤深慶慰共歌蓮燭之恩數即啓金甌之姓
名倚任獨親孰出宣公之右華近對堯更追溫氏之榮

